

ós que se refire o número 1 do punto dous deste artigo, co obxecto de garantir, cando proceda, o cumprimento do deber de notificación obrigatorio ó Servizo de Defensa da Competencia nos termos establecidos nos artigos 14 e seguintes da Lei 16/1989, do 17 de xullo, de defensa da competencia.»

**Disposición adicional terceira.** *Modifícase o artigo 16 da Lei 3/1991, do 10 de xaneiro, de competencia desleal, que pasa a te-la seguinte redacción:*

«Artigo 16. *Discriminación e dependencia económica.*

1. O tratamento discriminatorio do consumidor en materia de prezos e demais condicións de venda reputarase desleal, a non ser que medie causa xustificada.

2. Repútase desleal a explotación por parte dunha empresa da situación de dependencia económica en que se poidan encontra-las súas empresas clientes ou provedores que non dispoñan de alternativa equivalente para o exercicio da súa actividade. Esta situación presumirase cando un provedor, alén dos descontos ou condicións habituais, deba conceder ó seu cliente de forma regular outras vantaxes adicionais que non se conceden a compradores similares.

3. Terá, así mesmo, a consideración de desleal:

a) A ruptura, aínda que sexa de forma parcial, dunha relación comercial establecida sen que existise aviso previo escrito e preciso cunha anticipación mínima de seis meses, salvo que se deba a incumprimentos graves das condicións pactadas ou en caso de forza maior.

b) A obtención, baixo a ameaza de ruptura das relacións comerciais, de prezos, condicións de pagamento, modalidades de venda, pagamento de cargas adicionais e outras condicións de cooperación comercial non recollidas no contrato de subministración que se teña pactado.»

**Disposición derogatoria única.**

1. Quedan derogadas cantas disposicións se opoñan a esta lei.

2. Non obstante o disposto no número anterior, o Real decreto 157/1992, do 21 de febreiro, polo que se desenvolve a Lei 16/1989, do 17 de xullo, en materia de exencións por categorías, autorización singular e rexistro de defensa da competencia e o Real decreto 1080/1992, do 11 de setembro, sobre procedemento a seguir polos órganos de defensa da competencia en concentracións económicas e forma e contido da súa notificación voluntaria, seguirán en vigor ata o Goberno aprobar novos textos regulamentarios adaptados a esta lei.

**Disposición transitoria única.**

Os procedementos en materia de defensa da competencia iniciados antes da entrada en vigor desta lei tramitaranse e resolveranse conforme as disposicións en vigor ata o de agora.

**Disposición derradeira primeira.** *Desenvolvemento regulamentario da lei.*

1. Autorízase o Goberno para que no prazo de dezaioito meses dicte as disposicións regulamentarias que regulen os procedementos en materia de defensa da competencia.

2. Autorízase o Goberno para que no prazo dun ano dicte as disposicións regulamentarias de desenvolvemento do previsto no artigo 57 desta lei en materia de taxas.

**Disposición derradeira segunda.**

Antes do 1 de outubro do ano 2000, o Goberno presentará no Congreso dos Deputados un proxecto de lei polo que se regulen os criterios de conexión determinantes da atribución ó Estado e ás comunidades autónomas de competencias, previstas no marco legal de defensa da competencia, referidas ó coñecemento e aplicación da normativa estatal relativa a condutas prohibidas e autorizadas, en cumprimento da sentenza do Tribunal Constitucional do 11 de novembro de 1999.

**Disposición derradeira terceira.** *Entrada en vigor.*

Esta lei entrará en vigor ós tres meses da súa completa publicación no «Boletín Oficial del Estado», a excepción do disposto no artigo trixésimo segundo, en canto se refire ó número 1 do artigo 56, da Lei 16/1989, do 17 de xullo, que entrará en vigor o 1 de xaneiro do ano 2001, no relativo ó número 2 do artigo 56 da mesma lei, xa en vigor desde o 1 de xaneiro de 1998 en virtude da disposición transitoria décimo segunda da Lei 66/1997, de medidas fiscais, administrativas e da orde social.

Por tanto,

Mando a tódolos españois, particulares e autoridades, que cumpran e fagan cumprir esta lei.

Madrid, 28 de decembro de 1999.

JUAN CARLOS R.

O presidente do Goberno,  
JOSÉ MARÍA AZNAR LÓPEZ

**24707** *LEI 53/1999, do 28 de decembro, pola que se modifica a Lei 13/1995, do 18 de maio, de contratos das administracións públicas.* («BOE» 311, do 29-12-1999.)

JUAN CARLOS I

REI DE ESPAÑA

Saiban tódolos que a viren e a entenderen que as Cortes Xerais aprobaron e eu sanciono a seguinte lei.

EXPOSICIÓN DE MOTIVOS

A Lei 13/1995, do 18 de maio, de contratos das administracións públicas, derroga a Lei de contratos do Estado, introducindo importantes modificacións no réxime contractual das ditas administracións públicas, de conformidade cos obxectivos e finalidades que sinala a súa exposición de motivos.

Malia o relativo escaso tempo de vixencia da Lei de contratos das administracións públicas existen razóns que inciden na necesidade da modificación do seu texto que se realiza por esta lei. Por unha banda, dar cumprimento ó mandado contido na disposición transitoria décimo oitava da Lei 66/1997, do 30 de decembro, de medidas fiscais, administrativas e da orde social, que obriga o Goberno a lle remitir ó Congreso dos Deputados un proxecto de lei de reforma da citada Lei de contratos

das administracións públicas. Por outra banda, a obrigada incorporación á lexislación española das modificacións producidas na normativa comunitaria sobre contratos públicos, así como a aclaración do sentido de determinados preceptos, corrección de certas deficiencias técnicas e, sobre todo, a introducción dunha maior obxectividade, transparencia e concorrencia na contratación administrativa xustifican, tamén, a modificación do seu texto, que se leva a cabo respectando a estrutura e numeración de preceptos, sen máis modificacións, respecto desta última, cás mínimas e indispensables derivadas do seu novo contido. Como a Lei de contratos das administracións públicas, alén das modificacións que agora se introducen no seu texto, xa foi obxecto de alteracións polas leis 9/1996, do 15 de xaneiro; 11/1996, do 27 de decembro; 13/1996, do 30 de decembro; 66/1997, do 30 de decembro, e 50/1998, do 30 de decembro, prevese que se promulgue un texto refundido que incorpore tódalas modificacións experimentadas ata a data, co que se facilitará notablemente a súa aplicación.

A reforma da Lei de contratos das administracións públicas que agora se promulga obedece ás seguintes finalidades:

En primeiro lugar, introducir unha serie de disposicións que teñen por obxecto incrementa-la concorrencia e aumenta-la transparencia e obxectividade nos procedementos de adxudicación na contratación administrativa. Cabe destacar, neste sentido, o establecemento de maiores e máis eficaces controis para as modificacións dos contratos, con limitacións expresas por primeira vez no noso ordenamento ás modificacións de unidades do contrato con independencia da súa repercusión orzamentaria; a supresión da posibilidade de prórrogas tácitas nos contratos administrativos e a redución da duración dos contratos de xestión de servicios públicos, segundo os seus diferentes tipos e a dous anos do prazo máximo de duración dos contratos de consultoría e asistencia e os de servicios, co que se trata de favorecer-la concorrencia nestes contratos; a regulación máis adecuada dos supostos de baixa temeraria, introducindo a súa posible apreciación nos concursos e evitando a realización por sociedades pertencentes a un mesmo grupo de prácticas que poden desvirtua-la competencia; a esixencia dun maior rigor nos proxectos e o establecemento dun réxime máis estricto para a contratación conxunta de elaboración do proxecto e execución das obras correspondentes, así como para a posible aplicación do procedemento negociado na adxudicación de obras complementarias e a introducción de esixencias de maior dilixencia pola Administración na expedición de certificacións e no aboamento de liquidacións.

En segundo lugar, simplificar, no posible, os procedementos de contratación con respecto ós principios básicos de publicidade, libre concorrencia e transparencia na contratación das administracións públicas, propias de calquera ordenamento xurídico sobre a materia. Entre as medidas simplificadoras dos procedementos deben situarse as que afectan ós órganos e ás mesas de contratación; aquelas que establecen as cifras que permiten a utilización do procedemento negociado por razón da contía, posto que a experiencia demostrou que as que figuran no texto actual son inadecuadas, coincidindo, ademais, en ocasións, coas que delimitan a figura do contrato menor, o que suscitou dificultades de interpretación e aplicación dos respectivos preceptos; as que simplifican a presentación de documentación por parte dos licitadores, e as que reducen os prazos de publicidade cando non sexa preceptivo levala a cabo no «Diario Oficial das Comunidades Europeas».

En terceiro lugar, adapta-la lexislación española á normativa comunitaria sobre contratación pública, tendo en conta que as Directivas 93/36/CEE, 93/37/CEE e

92/50/CEE, sobre contratos de subministración, obras e servicios, o contido das cales incorpora a Lei de contratos das administracións públicas, foron modificadas pola Directiva 97/52/CE, do Parlamento e do Consello, do 13 de outubro, cunha data tope de incorporación ás lexislacións dos estados membros que a propia directiva modificadora das anteriores sitúa no día 13 de outubro de 1998.

En cuarto lugar, a Lei que agora se promulga suprime certas figuras contractuais e introduce outras novas para satisfacer-las necesidades das administracións públicas, que a práctica puxo de relevo. Ante todo, neste sentido, cómpre destaca-la supresión do contrato de traballos específicos e concretos non habituais, pola razón de que a colaboración con profesionais que pretendía atender pode ser perfectamente articulada a través de contratos de consultoría e asistencia, evitando as dúbidas e dificultades que o carácter residual e a definición negativa dos contratos que agora se suprimen suscitaron na práctica da súa aplicación concreta e, por outra parte, admítense, con certos límites, as figuras dos contratos de arrendamento financeiro e de arrendamento con opción de compra, superando o obstáculo que para a súa utilización supuña a prohibición de prezo aprazado, e os contratos con empresas de traballo temporal, co cal se pretende dota-las administracións públicas de figuras e modalidades contractuais de normal utilización no tráfico contractual privado.

Por último, as modificacións da Lei de contratos das administracións públicas perseguen unha finalidade aclaratoria de determinados preceptos e a corrección de certas deficiencias técnicas que se observan na redacción actual. Sen que resulte posible unha enumeración concreta neste punto, cabe resaltar como máis significativas a aclaración do réxime xurídico de determinados contratos, precisando, respecto dalgúns, o seu carácter de privados que non resultaba expresamente da lei que se modifica e aclarando o réxime xurídico da denominada concesión de obras públicas, de acordo coas directivas comunitarias; determinados aspectos relativos á contratación das entidades locais; a nova regulación das garantías provisionais e as alteracións que se producen no réxime das garantías definitivas; as prescricións relativas ós proxectos de obras, como elemento básico para a súa correcta execución, e aspectos concretos referentes ás relacións entre contratistas e subcontratistas e subministradores, modificación, resolución e nulidade dos respectivos contratos, ben con carácter xeral, ben con carácter específico para cada uno dos tipos de contratos regulados no libro II da lei.

### Artigo único.

Introdúcense nos artigos, alíneas, disposicións e rúbricas da Lei 13/1995, do 18 de maio, de contratos das administracións públicas, que a continuación se enumeran, as modificacións que se indican, que se incorporarán a ela nos seguintes termos:

### Artigo 2.

Dáselles nova redacción ós números 1 e 2 que integran o artigo:

«Artigo 2. *Adxudicación de determinados contratos de dereito privado.*

1. As entidades de dereito público non comprendidas no ámbito definido no artigo anterior quedarán suxeitas ás prescricións desta lei relativas á capacidade das empresas, publicidade, procedementos de licitación e formas de adxudicación, res-

pecto dos contratos nos que concorran os seguintes requisitos:

a) Que se trate de contratos de obras e de contratos de consultoría e asistencia e de servicios relacionados cos primeiros, sempre que o seu importe, con exclusión do imposto sobre o valor engadido, sexa igual ou superior a 836.621.683 pesetas, se se trata de contratos de obras, ou a 33.464.867 pesetas, se se trata de calquera outro contrato dos mencionados.

b) Que a principal fonte de financiamento dos contratos proceda de transferencias ou achegas de capital provenientes directa ou indirectamente das administracións públicas.

2. Quedan suxeitos ás prescricións a que se refire o número anterior os contratos de obras da clase 50, grupo 502, da Nomenclatura Xeral de Actividades Económicas das Comunidades Europeas (NACE), os de construción relativos a hospitais, equipamentos deportivos, recreativos ou de ocio, edificios escolares ou universitarios e a edificios de uso administrativo e os contratos de consultoría e asistencia e de servicios que estean relacionados cos contratos de obras mencionados, cando sexan subvencionados directamente pola Administración con máis do 50 por 100 do seu importe, sempre que este, con exclusión do imposto sobre o valor engadido, sexa igual ou superior a 812.167.867 pesetas, se se trata de contratos de obras, ou a 32.486.708 pesetas, se se trata de calquera outro contrato dos mencionados.»

#### Artigo 5.

Dáselles nova redacción ós números 2 e 3.

«Artigo 5. *Carácter administrativo e privado dos contratos.*

2. Son contratos administrativos:

a) Aqueles que teñan por obxecto directo, conxunta ou separadamente, a execución de obras, a xestión de servicios públicos e a realización de subministracións, os de consultoría e asistencia ou de servicios, agás os contratos comprendidos na categoría 6 do artigo 207 referente a contratos de seguros e bancarios e de investimentos e, dos comprendidos na categoría 26 do mesmo artigo, os contratos que teñan por obxecto a creación e interpretación artística e literaria e os de espectáculos.

b) Os de obxecto distinto ós anteriormente expresados, pero que teñan natureza administrativa especial por resultaren vinculados ó xiro ou tráfico específico da administración contratante, por satisfaceren de forma directa ou inmediata unha finalidade pública da específica competencia daquela ou por declaralo así unha lei.

3. Os restantes contratos subscritos pola Administración terán a consideración de contratos privados e, en particular, os contratos de compravenda, doazón, permuta, arrendamento e demais negocios xurídicos análogos sobre bens inmóviles, propiedades incorporais e valores negociables, así como os contratos comprendidos na categoría 6 do artigo 207 referente a contratos de seguros e bancarios e de investimentos e, dos comprendidos na categoría 26 do mesmo artigo, os contratos que teñan por obxecto a creación e interpretación artística e literaria e os de espectáculos.»

#### Artigo 8.

Dáselle nova redacción ó artigo, que se divide en tres números:

«Artigo 8. *Contratos administrativos especiais.*

1. Os contratos administrativos especiais adxudicaranse de conformidade co disposto no libro I desta lei, sen prexuízo do establecido no artigo 7.1.

2. No prego de cláusulas administrativas particulares farase constar:

a) O seu carácter de contratos administrativos especiais.

b) As garantías provisionais e definitivas.

c) As prerrogativas da Administración a que se refire o artigo 60.1.

d) O alcance das prórrogas, sen que poidan producirse estas por mutuo consentimento tácito.

e) As causas específicas de resolución que se establezan expresamente.

f) A competencia da orde xurisdiccional contencioso-administrativa para coñecer das cuestións que poidan suscitarse en relación con eles.

3. Serán causa de resolución, ademais das establecidas no artigo 112, as seguintes:

a) A suspensión por causa imputable á Administración da iniciación do contrato por prazo superior a seis meses a partir da data sinalada nel para o seu comezo, agás que no prego se sinale outro menor.

b) A desistencia ou a suspensión do contrato por prazo superior a un ano acordada pola Administración, agás que no prego se sinale outro menor.

c) As modificacións do contrato, aínda que fosen sucesivas, que impliquen, illada ou conxuntamente, alteracións do prezo do contrato en contía superior, en máis ou en menos, ó 20 por 100 do prezo primitivo do contrato, imposto sobre o valor engadido excluído, ou que representen unha alteración substancial del.»

#### Artigo 9.

Dáselle nova redacción ó número 1 e engádese un novo número 2 co que o actual número 2 pasa a figurar como número 3:

«Artigo 9. *Réxime xurídico dos contratos privados.*

1. Os contratos privados das administracións públicas rexeranse en canto á súa preparación e adxudicación, en defecto de normas administrativas específicas, por esta lei e polas súas disposicións de desenvolvemento, e en canto ós seus efectos e extinción, polas normas de dereito privado. Os contratos de compravenda, doazón, permuta, arrendamento e demais negocios xurídicos análogos sobre bens inmóviles, propiedades incorporais e valores negociables aplicaráselles, en primeiro lugar, en canto á súa preparación e adxudicación, as normas da lexislación patrimonial das correspondentes administracións públicas.

2. Os contratos comprendidos na categoría 6 do artigo 207 referente a contratos de seguros e bancarios e de investimentos e, dos comprendidos na categoría 26 do mesmo artigo, os contratos que teñan por obxecto a creación e interpretación artística e literaria e os de espectáculos adxudicaranse conforme as normas contidas nos capítulos II e III do título IV, libro II, desta lei.»

## Artigo 11.

Dáselle nova redacción ó encabezamento do número 2:

«Artigo 11. *Requisitos dos contratos.*

2. Son requisitos para a subscrición dos contratos das administracións públicas, agás que expresamente se dispoña outra cousa nesta lei, os seguintes:»

## Artigo 12.

Dáselles nova redacción ós números 1, 2 e 4 e engádesse un novo número 5, pasando o actual número 5 a figurar como número 6:

«Artigo 12. *Órganos de contratación.*

1. Os ministros e os secretarios de Estado son os órganos de contratación da Administración xeral do Estado e están facultados para subscribir no seu nome os contratos, no ámbito da súa competencia.

Os representantes legais dos organismos autónomos e demais entidades públicas estatais e os directores xerais das distintas entidades xestoras e servicios comúns da Seguridade Social, son os órganos de contratación duns e outros; os titulares dos departamentos ministeriais a que se encontren adscritos poderán fixa-la contía a partir da cal será necesaria a súa autorización para a subscrición dos contratos.

Nos departamentos ministeriais nos que coexistan varios órganos de contratación a competencia para subscribi-los contratos de subministración e de consultoría e asistencia e de servicios que afectan o ámbito de máis dun órgano de contratación corresponderalle ó ministro, agás nos casos en que a competencia se lle atribúa á Xunta de Contratación e sen prexuízo do disposto nos artigos 183.g) e 211.f) desta lei para a contratación de bens e servicios declarados de uniformidade obrigatoria para a súa utilización específica polos servicios dun determinado departamento ministerial.

2. Non embargante, o órgano de contratación necesitará a autorización do Consello de Ministros, nos seguintes supostos:

a) Cando o orzamento sexa igual ou superior a 2000.000.000 de pesetas.

b) Nos contratos de carácter plurianual cando se modifiquen as porcentaxes ou o número de anualidades legalmente previstas ás que se refire o artigo 61 da Lei xeral orzamentaria.

c) Cando o pagamento dos contratos se concerte mediante o sistema de arrendamento financeiro ou mediante o sistema de arrendamento con opción de compra e o número de anualidades superior ao previsto no artigo 14.4.

Nos contratos que, de acordo co previsto no parágrafo anterior, requiran a autorización do Consello de Ministros, esta producirase con carácter previo á aprobación do expediente de contratación que, o mesmo que a aprobación do gasto, lle corresponderá ó órgano de contratación.

O Consello de Ministros poderá reclamar discrecionalmente o coñecemento e autorización de calquera outro contrato. Igualmente o órgano de contratación, a través do ministro correspondente, poderá elevar un contrato non comprendido nas letras precedentes á consideración do Consello de Ministros.

Cando o Consello de Ministros autorice a subscrición do contrato deberá autorizar igualmente a súa modificación cando sexa causa de resolución e a resolución mesma, se é o caso.»

«4. Sen prexuízo do disposto nos números anteriores, poderán constituírse xuntas de contratación nos departamentos ministeriais e nos seus organismos autónomos e entidades de dereito público, así como nas entidades xestoras e servicios comúns da Seguridade Social, que actuarán como órganos de contratación, cos límites cuantitativos ou referentes ás características dos contratos que determine o titular do departamento nos seguintes contratos:

a) Nos contratos de obras comprendidas nas letras b) e c) do artigo 123.1.

b) Nos contratos de subministración que se refiran a bens consumibles ou de fácil deterioración polo uso, agás nos supostos previstos no artigo 184.

c) Nos contratos de consultoría e asistencia e nos de servicios, agás nos supostos previstos no artigo 200.

d) Nos contratos de subministración, de consultoría e asistencia e de servicios, distintos dos atribuídos á competencia da xunta conforme as dúas letras anteriores que afecten a máis dun órgano de contratación.

As xuntas de contratación terán a composición que regulamentariamente se determine, debendo figurar necesariamente entre os seus vocais un funcionario de entre os que teñan atribuído legal ou regulamentariamente o asesoramento xurídico do órgano de contratación e un interventor.

5. Excepcionalmente, cando o contrato resulte de interese para varios departamentos ministeriais e, por razóns de economía e eficacia, a tramitación do expediente deba ser efectuada por un único órgano de contratación, os demais departamentos interesados poderán contribuír ó seu financiamento, nos termos en que se determine regulamentariamente e con respecto á normativa orzamentaria, mediante convenios ou protocolos de actuación.»

## Artigo 14.

Suprímese o número 2 e dáselle nova redacción ó número 1, ó número 3, que pasa a constituí-lo número 2, o número 4 pasa a figurar como número 3 e engádesse un novo número 4:

«Artigo 14. *Prezo dos contratos.*

1. Os contratos terán sempre un prezo certo, que se expresará en moeda nacional, sen prexuízo do disposto na disposición transitoria décimo primeira, e aboaránselle ó contratista en función da prestación realmente efectuada e de acordo co convindo. Cando as condicións establecidas no contrato impliquen pagamentos en moeda estranxeira deberá expresarse, ademais do prezo total en moeda nacional, o importe máximo daquela e a clase de divisas de que se trate. En todo caso os órganos de contratación coidarán de que o prezo dos contratos sexa o adecuado ó mercado.

2. Prohíbese o pagamento aprazado do prezo nos contratos, agás nos supostos en que o sistema de pagamento se estableza mediante a modalidade de arrendamento financeiro ou mediante o sistema de arrendamento con opción de compra e nos casos que unha lei o autorice expresamente.

3. O financiamento dos contratos pola Administración axustarase ó ritmo requirido na execución da prestación; para este fin o órgano de contratación deberá adoptar as medidas que sexan necesarias no momento da programación das anualidades e durante o período de execución.

4. O establecido no número 3 deste artigo non será de aplicación nos contratos en que o pagamento se estableza mediante a modalidade de arrendamento financeiro ou de arrendamento con opción de compra; neste caso o límite máximo para o seu pagamento será de catro anos a partir da adjudicación do contrato, agás que se acorde outro límite maior cando así sexa autorizado polo Consello de Ministros.»

#### Artigo 15.

Dáselle nova redacción ó número 2:

«Artigo 15. *Capacidade das empresas.*

2. A capacidade de obrar dos empresarios que foren persoas xurídicas acreditarase mediante a escritura de constitución ou modificación, se é o caso, inscrita no Rexistro Mercantil, cando este requisito for esixible conforme a lexislación mercantil que lle sexa aplicable. Se non o for, a acreditación da capacidade de obrar realizarase mediante a escritura ou documento de constitución, estatutos ou acto fundacional, no que constaren as normas polas que se regula a súa actividade, inscritos, se é o caso, no correspondente rexistro oficial. Cando se trate de empresarios non españois de Estados membros da Comunidade Europea, deberán acreditar a súa inscrición nun rexistro profesional ou comercial cando este rexistro sexa esixido pola lexislación do Estado respectivo. Os demais empresarios estranxeiros deberán acreditar a súa capacidade de obrar con certificación expedida pola Embaixada de España no Estado correspondente.»

#### Artigo 16.

Dáselle nova redacción á letra b) do número 1:

«Artigo 16. *Solvencia económica e financeira.*

b) Tratándose de persoas xurídicas, presentación das contas anuais ou extracto delas no suposto de que a publicación destas sexa obrigatoria nos Estados onde aquelas se encontren establecidas.»

#### Artigo 17.

Dáselle nova redacción á letra d):

«Artigo 17. *Solvencia técnica nos contratos de obras.*

d) Declaración sobre os efectivos persoais medios anuais da empresa, indicando, se é o caso, grao de estabilidade no emprego deles e a importancia dos seus equipos directivos durante os tres últimos anos.»

#### Artigo 18.

Dáselle nova redacción á letra c).

«Artigo 18. *Solvencia técnica nos contratos de subministración.*

c) Indicación dos técnicos ou das unidades técnicas, integradas ou non na empresa, participantes no contrato, especialmente daqueles encargados do control de calidade, así como, se é o caso, grao de estabilidade no emprego do persoal integrado na empresa.»

#### Artigo 19.

Dáselle nova redacción á letra d).

«Artigo 19. *Solvencia técnica ou profesional nos restantes contratos.*

d) Unha declaración que indique a media anual de persoal, con mención, se é o caso, do grao de estabilidade no emprego e o cadro do persoal directivo durante os últimos tres anos.»

#### Artigo 20.

Dáselle nova redacción ás letras a), d) e e):

«Artigo 20. *Prohibicións de contratar.*

a) Teren sido condenadas mediante sentenza firme por delitos de falsidade, contra o patrimonio e contra a orde socioeconómica, suborno, malversación, tráfico de influencias, revelación de segredos, uso de información privilexiada, delitos contra a Facenda Pública e a Seguridade Social, delitos contra os dereitos dos traballadores ou por delitos relativos ó mercado e ós consumidores. A prohibición de contratar alcanza as persoas xurídicas das que os administradores ou representantes, vixente o seu cargo ou representación, se encontren na situación mencionada por actuacións realizadas en nome ou a beneficio das ditas persoas xurídicas ou nas que concorran as condicións, calidades ou relacións que requira a correspondente figura de delito para ser suxeito activo del.»

«d) Teren sido sancionadas con carácter firme por infracción grave en materia de disciplina de mercado, en materia profesional ou en materia de integración laboral de minusválidos ou moi grave en materia social, de acordo co disposto na Lei 8/1988, do 7 de abril, sobre infraccións e sancións na orde social, ou en materia de seguridade e saúde no traballo, de conformidade co disposto na Lei 31/1995, do 8 de novembro, sobre prevención de riscos laborais.

e) Estar incurso a persoa física ou os administradores da persoa xurídica nalgún dos supostos da Lei 12/1995, do 11 de maio, de incompatibilidades dos membros do Goberno da Nación e dos altos cargos da Administración xeral do Estado; da Lei 53/1984, do 26 de decembro, de incompatibilidades do persoal ó servizo das administracións públicas, ou tratarse de calquera dos cargos electivos regulados na Lei orgánica 5/1985, do 19 de xuño, do réxime electoral xeral, nos termos establecidos nela.

A prohibición alcanza tamén os cónxuxes, persoas vinculadas con análoga relación de convivencia afectiva e descendentes das persoas a que se refire o parágrafo anterior, sempre que, respecto dos últimos, as devanditas persoas ostenten a súa representación legal.

As disposicións ás que se refire este número serán aplicables ás comunidades autónomas e ás entidades locais nos termos en que, respectivamente, lles sexan aplicables.»

#### Artigo 21.

Dáselle nova redacción ó número 1:

«Artigo 21. *Procedemento para a súa declaración e efectos.*

1. As prohibicións de contratar contidas nas letras b), e), f), i), j) e k) do artigo anterior serán

apreciadas de forma automática polos órganos de contratación e subsistirán mentres concorran as circunstancias que en cada caso as determinan.

A prohibición de contratar polas causas previstas na letra a) do artigo anterior será apreciada de forma automática polos órganos de contratación. Non obstante, o alcance da prohibición determinarase no procedemento que, de conformidade co disposto nos números 2 e 3 deste artigo, deberá necesariamente instruírse.

Nos restantes supostos, a prohibición de contratar requirirá a súa previa declaración mediante procedemento do que a resolución fixará expresamente a Administración á que afecte e a súa duración.

A declaración da prohibición para contratar nos supostos a que se refiren as letras a), d), g), h) e j) do artigo anterior ou a apreciación dela nas causas das letras b), e) e f) producirá a suspensión das clasificacións que lles fosen concedidas ás empresas durante o prazo de duración da prohibición ou mentres subsista a causa determinante da súa apreciación, sen que, en consecuencia, proceda a tramitación do expediente a que fai referencia o artigo 34.1.»

#### Artigo 23.

Dáselles nova redacción ós números 1 e 2:

«Artigo 23. *Empresas estranxeiras non comunitarias.*

1. As persoas físicas ou xurídicas de estados non pertencentes á Comunidade Europea, ademais de acreditaren a súa plena capacidade para contratar e obrigarse conforme a lexislación do seu Estado e a súa solvencia económica e financeira, técnica ou profesional, deberán xustificar, mediante informe da respectiva representación diplomática española, que se achegará á documentación que se presente, que o Estado de procedencia da empresa estranxeira admite pola súa banda a participación de empresas españolas na contratación coa Administración, en forma substancialmente análoga.

Nos contratos de obras, de subministración, de consultoría e asistencia e de servicios, de contía igual ou superior á sinalada nos artigos 135.1, 178.2 e 204.2, deberá prescindirse do informe sobre reciprocidade a que se refire o número anterior en relación coas empresas de estados signatarios do Acordo sobre contratación pública da Organización Mundial de Comercio.

2. Tratándose de contratos de obras será necesario, ademais, que estas empresas teñan aberta sucursal en España, con designación de apoderados ou representantes para as súas operacións e que estean inscritas no Rexistro Mercantil.»

#### Artigo 24.

Dáselle nova redacción ó número 1:

«Artigo 24. *Unións de empresarios.*

1. A Administración poderá contratar con unións de empresarios que se constitúan temporalmente para o efecto, sen que sexa necesaria a formalización de tales unións en escritura pública ata que se efectúe a adxudicación ó seu favor.

Os citados empresarios quedarán obrigados solidariamente ante a Administración e deberán nomear un representante ou apoderado único da unión con poderes bastantes para exercerlos derei-

tos e cumpri-las obrigas que deriven do contrato ata a extinción deste, sen prexuízo da existencia de poderes mancomunados que poidan outorgar para cobros e pagamentos de contía significativa.

A duración das unións temporais de empresarios será coincidente coa do contrato ata a súa extinción.»

#### Artigo 25.

Dáselle nova redacción ó número 1:

«Artigo 25. *Supostos de clasificación.*

1. Para contratar coas administracións públicas a execución de contratos de obras ou de contratos de servicios ós que se refire o artigo 197.3 con excepción dos comprendidos nas categorías 6 e 21 do artigo 207 e, dos comprendidos na categoría 26 do mesmo artigo, os contratos que teñan por obxecto a creación e interpretación artística e literaria e os de espectáculos, en ámbolos casos por orzamento igual ou superior a 20.000.000 de pesetas será requisito indispensable que o empresario obtivese previamente a correspondente clasificación. Este requisito seralle esixido igualmente ó cesionario dun contrato no caso en que lle fose esixido ó cedente.

Por real decreto poderá exceptuarse a clasificación para determinados grupos e subgrupos dos contratos de obras e de servicios nos que este requisito sexa esixible ou acorda-la esixencia de clasificación en grupos e subgrupos dos contratos de obras, consultoría e asistencia e servicios, cando, segundo as disposicións vixentes, tal requisito non sexa esixible tendo en conta as circunstancias especiais concorrentes nos citados grupos e subgrupos.

O límite establecido no parágrafo primeiro deste número poderá ser elevado ou diminuído para cada tipo de contrato polo ministro de Economía e Facenda logo de audiencia das comunidades autónomas de acordo coas esixencias da conxuntura económica.»

#### Artigo 26.

Suprímese o número 1, pasando os números 2 e 3 a figurar como números 1 e 2, respectivamente.

#### Artigo 28.

Queda sen contido.

#### Artigo 29.

Suprímese o segundo inciso do número 1 e dáselles nova redacción ós números 2, 3 e 4.

«Artigo 29. *Competencia para a clasificación.*

1. Os acordos sobre clasificación e revisión de clasificacións serán adoptados pola Xunta Consultiva de Contratación Administrativa do Ministerio de Economía e Facenda, a través de comisións clasificadoras que, por delegación permanente daquela, entenderán en cantos expedientes se relacionen coa clasificación das empresas, producindo tales acordos efectos ante calquera órgano de contratación. As comisións clasificadoras, a composición das cales se determinará regulamentariamente, estarán integradas polos representantes da Administración e das organizacións empresariais máis representativas nos distintos sectores afectados pola contratación administrativa.

2. Os acordos de clasificación e revisión adoptados pola Xunta Consultiva de Contratación Administrativa poderán ser obxecto de recurso de alzada perante o ministro de Economía e Facenda.

3. Os acordos sobre clasificación e revisión de clasificacións para os contratos que subscriban os órganos de contratación das comunidades autónomas, os seus organismos autónomos e demais entidades públicas poderán ser adoptados polos correspondentes órganos das ditas comunidades, respecto das empresas domiciliadas no seu territorio, que aplicarán as mesmas regras e criterios establecidos nesta lei e nas súas disposicións de desenvolvemento.

Para que estes acordos produzan efectos ante órganos de contratación da Administración xeral do Estado ou de comunidades autónomas distintas das que os adopta terán que ser obxecto de inscrición no Rexistro Oficial de Empresas Clasificadas a que se refire o número 1 do artigo 35.

4. En relación cos contratos que subscriban os órganos de contratación das entidades locais, os seus organismos autónomos e demais entidades públicas producirán efecto as clasificacións acordadas pola Xunta Consultiva de Contratación Administrativa do Ministerio de Economía e Facenda, pola comunidade autónoma respectiva ou por outra comunidade autónoma, sempre que, neste último caso, se realizase a inscrición a que se refire o número anterior no Rexistro Oficial de Empresas Clasificadas.»

#### Artigo 30.

Dáselle nova redacción ó artigo 30, na seguinte forma:

«Artigo 30. *Duración e revisión das clasificacións.*

A clasificación das empresas acordarase por un prazo de dous anos e efectuarase en función dos elementos persoais, materiais, económicos e técnicos de que dispoñan respecto da actividade en que a soliciten e, se é o caso, da experiencia en traballos realizados directamente no último quinquenio.

As clasificacións acordadas serán revisables por petición dos interesados ou de oficio pola Administración en canto deixen de ser actuais as bases tomadas para establecelas.»

#### Artigo 35.

Modifícase o título do artigo dándoselle nova redacción e engádense dous novos números 3 e 4:

«Artigo 35. *Rexistro Oficial de Empresas Clasificadas.*

1. O Rexistro Oficial de Empresas Clasificadas dependerá do Ministerio de Economía e Facenda. O acceso ó rexistro será público.

O devandito rexistro será levado pola Xunta Consultiva de Contratación Administrativa e nel serán inscritos tódolos empresarios que fosen clasificados por ela para os fins establecidos nesta lei.

Na inscrición expresarase o contido da clasificación respectiva, así como cantas incidencias se produzan durante a súa vixencia.

2. As comunidades autónomas poderán crear, así mesmo, os seus propios rexistros oficiais de empresas clasificadas.

3. Para os efectos do previsto no número 3 do artigo 29, as comunidades autónomas que pretendan darlles efecto xeral ós seus acordos de cla-

sificación e revisión das clasificacións remitiranlle os respectivos expedientes á comisión de clasificación que corresponda da Xunta Consultiva de Contratación Administrativa, que, polo procedemento e dentro do prazo que regulamentariamente se establezan, dictará acordo sobre a inscrición ou denegación daquela que lle será notificado á empresa e á Comunidade Autónoma.

O desenvolvemento regulamentario a que se refire o parágrafo anterior establecerá, con carácter previo á adopción do acordo denegatorio pola Comisión de Clasificación da Xunta Consultiva de Contratación Administrativa, un trámite específico para que a Comunidade Autónoma poida formular observacións e achegar xustificacións sobre o acordo de clasificación adoptado por ela e que se pretende que produza efectos ante órganos de contratación da Administración xeral do Estado ou de comunidades autónomas distintas.

En ningún caso o acordo denegatorio da citada Comisión de Clasificación da Xunta Consultiva de Contratación Administrativa poderá basearse en motivos distintos ó de non ter aplicado a comunidade autónoma as regras e criterios a que se refire o número 3 do artigo 29.

4. O Rexistro Oficial de Empresas Clasificadas dependente do Ministerio de Economía e Facenda e os Rexistros Oficiais de Empresas Clasificadas das comunidades autónomas, no desenvolvemento da súa actividade e nas súas relacións recíprocas, facilitaranlles ás outras administracións a información que estas precisen sobre o contido dos respectivos rexistros.»

#### Artigo 36.

Dáselles nova redacción ós números 1, 3 e 4 e suprímese o número 2, pasando os números 3, 4, 5, 6 e 7 a figurar como números 2, 3, 4, 5 e 6, respectivamente, quedando a redacción do artigo na seguinte forma:

«Artigo 36. *Garantías provisionais.*

1. Nos contratos comprendidos nesta lei será requisito necesario para acudir ós procedementos abertos ou restrinxidos de contía igual ou superior á fixada nos artigos 135.1, 178.2 e 204.2, segundo o tipo de contrato de que se trate, acreditarla constitución previa, á disposición do correspondente órgano de contratación, dunha garantía provisional equivalente ó 2 por 100 do orzamento do contrato, entendéndose por tal o establecido pola Administración como base da licitación, agás nos supostos en que non se fixese fixación previa do orzamento, nos que será determinado estimativamente polo órgano de contratación. Esta garantía terá que ser constituída:

a) En metálico ou en valores públicos ou privados, con suxeición, en cada caso, ás condicións regulamentariamente establecidas. Ó metálico, os valores ou os certificados correspondentes, depositaranse na Caixa Xeral de Depósitos ou nas súas sucursais ou nas caixas ou establecementos públicos equivalentes das comunidades autónomas ou entidades locais na forma e coas condicións que regulamentariamente se establezan.

b) Mediante aval prestado, na forma e condicións regulamentarias, por algún dos bancos, caixas de aforros, cooperativas de crédito, establecementos financeiros de crédito e sociedades de garantía recíproca autorizados para operar en España e presentado ante o correspondente órgano de contratación.

c) Por contrato de seguro de caución celebrado na forma e condicións que regulamentariamente se establezan, con entidade aseguradora autorizada para operar no ramo de caución, debendo entregárselle o certificado do contrato ó correspondente órgano de contratación.

Nos contratos de contía inferior á sinalada neste número a esixencia de garantía provisional será potestativa para o órgano de contratación.

2. A garantía provisional seralles devolta ós interesados inmediatamente despois da proposta de adxudicación do contrato nos casos nos que a forma de adxudicación sexa a poxa ou da adxudicación, cando aquela sexa por concurso. A garantía seralle retida ó empresario incluído na proposta de adxudicación ou ó adxudicatario e incautada ás empresas que retiren inxustificadamente a súa proposición antes da adxudicación.

3. Nos supostos de presunción de temeridade, ós que se refiren os artigos 84.2, letra b), e 87.3 seralles retida a garantía ós empresarios comprendidos nela, así como ó mellor ofertante ou ó que presente a oferta máis vantaxosa dos que non o estean, ata que se dicte o acordo de adxudicación.

4. En caso de non-formalización do contrato por causas imputables ó contratista, haberá que se ater ó disposto no artigo 55.

5. No procedemento negociado, cando se solicite a oferta dalgún ou dalgúns empresarios, calquera que sexa a contía do contrato, o órgano de contratación poderalles esixir a constitución dunha garantía provisional que producirá os seus efectos ata o momento da adxudicación.

6. A constitución da garantía global a que se refire o número 2 do artigo seguinte eximirá da constitución da garantía provisional, producindo aquela os efectos inherentes a esta última.»

### Artigo 37.

Dáselles nova redacción ós números 1, 2, 3 e 4 e engádesse un número 5, novo:

«Artigo 37. *Garantías definitivas, especiais e complementarias.*

1. Os adxudicatarios dos contratos regulados nesta lei están obrigados a constituír unha garantía definitiva polo importe do 4 por 100 do importe de adxudicación, á disposición do órgano de contratación, calquera que fose o procedemento e a forma de adxudicación do contrato, que deberá constituírse:

a) Na mesma clase de bens e nos establecementos sinalados na alínea 1.a) do artigo anterior.

b) Mediante aval prestado na forma e condicións regulamentarias, polas entidades indicadas na alínea 1.b) do artigo precedente e constituído nos establecementos sinalados na alínea 1.a) do mesmo artigo.

c) Por contrato de seguro de caución celebrado na forma e condicións que regulamentariamente se determinen, coas entidades referidas na alínea 1.c) do artigo anterior, debendo entregarse a póliza nos establecementos sinalados na alínea 1.a) do mesmo artigo.

Cando o prezo do contrato se determine en función de prezos unitarios, o importe da garantía que hai que constituír será do 4 por 100 do orzamento base de licitación.

Nos contratos privados será facultativa para o órgano de contratación a esixencia da garantía definitiva.

2. Alternativamente ó establecido no número anterior, o contratista poderá constituír unha garantía global con referencia a tódolos contratos que subscriba cunha Administración pública ou cun ou varios órganos de contratación sen especificación singular para cada contrato, nalgunha das modalidades previstas nas letras b) e c) do artigo 36.1.

A garantía global deberá ser depositada na Caixa Xeral de Depósitos ou nas súas sucursais encadradas nas delegacións provinciais de Economía e Facenda ou nas caixas ou establecementos públicos equivalentes das comunidades autónomas ou entidades locais contratantes, segundo a Administración ante a que ten que producir efecto.

A garantía global responderá, en tódolos contratos que se vaian subscribir ou subscritos cunha Administración pública ou cun ou varios órganos de contratación, xenérica e permanentemente, do mantemento das proposicións e da formalización do contrato, no suposto de garantía provisional, ata o 2 por 100 do orzamento do contrato e no suposto de garantía definitiva, do cumprimento polo adxudicatario das obrigas de tódolos contratos ata o 4 por 100, ou porcentaxe maior que proceda segundo esta lei, do importe de adxudicación ou do orzamento base de licitación, cando o prezo se determine en función de prezos unitarios, sen prexuízo de que a indemnización de danos e perdas a favor da Administración que, se é o caso, poida producirse, se exerza sobre o resto da garantía global.

A correspondente caixa ou establecemento, para efectos da constitución de garantías e por solicitude dos interesados, emitirá certificación comprensiva da existencia da garantía global e da suficiencia dela no prazo máximo de tres días hábiles desde a presentación da solicitude do interesado, procedéndose a inmovilizarlo importe da garantía que se vai constituír. No caso de garantías provisionais, se o solicitante non resultase adxudicatario, deixárase sen efecto a dita inmovilización e, en caso contrario, incrementarase esta ata cubri-lo importe da garantía definitiva, especial ou complementaria correspondente, sen prexuízo do reajuste a que houber lugar nos termos do artigo 43 desta lei. No caso de garantías definitivas, unha vez producido o vencemento do prazo de garantía e cumprido satisfactoriamente o contrato, ou resolvido este sen culpa do contratista, procederase á liberación do saldo inmovilizado.

O disposto neste número enténdese sen prexuízo das regras xerais desta lei en canto a responsabilidade das garantías, cancelación ou devolución delas en relación coa inmovilización ou incautación do importe das respectivas garantías.

3. En casos especiais o órgano de contratación poderá establecer no prego de cláusulas administrativas particulares que, ademais da garantía a que se refire o número 1, se preste unha adicional que non poderá supera-lo 6 por 100 do importe de adxudicación do contrato, podéndose acadar unha garantía total de ata un 10 por 100 do citado importe. Para tódolos efectos, a dita garantía terá a consideración de garantía definitiva.

4. No suposto de adxudicación a un empresario a proposición do cal estivese incurso inicialmente en presunción de temeridade, á que se refiren os artigos 84.2.b) e 87.3, o órgano de contratación esixiralle ó contratista a constitución dunha garantía definitiva polo 20 por 100 do importe de adxudicación ou do orzamento base de licitación, cando o prezo se determine en función de



prezos unitarios, que substituirá a do 4 por 100 prevista no número 1, sen que resulte de aplicación o disposto no número precedente e para a cancelación da cal haberá que se ater ó disposto no artigo 48.4.

5. O prego de cláusulas administrativas particulares poderá, así mesmo, establecer un sistema de garantías complementarias, de ata un 16 por 100 do prezo do contrato, en función da desviación á baixa da oferta seleccionada da que se defina como oferta media e da aproximación daquela ó limiar a partir do cal as ofertas deben ser consideradas como anormalmente baixas.»

#### Artigo 38.

Dáselle nova redacción ó artigo:

«Artigo 38. *Garantía definitiva en determinados contratos.*

Malia o disposto no artigo anterior, nos contratos de consultoría e asistencia, nos de servizos e nos contratos administrativos especiais a garantía definitiva poderá ser dispensada cando así se faga constar no prego de cláusulas administrativas particulares, debendo motivarse no expediente de contratación as causas de tal dispensa.»

#### Artigo 40.

Dáselle nova redacción á letra b):

«Artigo 40. *Excepcións á constitución de garantías.*

b) Aqueles nos que o contratista entregue inmediatamente os bens consumibles ou de fácil deterioración antes do pagamento do prezo, agás que exista prazo de garantía, e nos de arrendamento e nas súas modalidades de arrendamento financeiro e arrendamento con opción de compra, sempre que non vaian unidos ó mantemento dos bens obxecto do contrato.»

#### Artigo 42.

Dáselle nova redacción ó número 1 e engádese un número 3, novo:

«Artigo 42. *Constitución de garantías.*

1. O adxudicatario deberá acreditar no prazo de quince días, contados desde que se lle notifique a adxudicación do contrato, a constitución da garantía definitiva. De non cumprirse este requisito por causas imputables ó adxudicatario, a Administración declarará resolto o contrato.»

«3. A garantía definitiva nos contratos de consultoría e asistencia, nos de servizos e nos contratos administrativos especiais poderá levarse a cabo en forma de retención do prezo.»

#### Artigo 43.

Dáselle nova redacción ó artigo:

«Artigo 43. *Reaxuste de garantías.*

Cando como consecuencia da modificación do contrato experimente variación o seu prezo, reaxustarase a garantía no prazo sinalado no artigo anterior, contado desde a data en que se lle notifique ó empresario o acordo de modificación, para que garde a debida proporción co prezo do contrato resultante da súa modificación.»

#### Artigo 44.

Dáselle nova redacción ó artigo, engadíndolle un número 1 e pasando a actual redacción do artigo a constituílo número 2:

«Artigo 44. *Extensión das garantías.*

1. A garantía provisional responderá do mantemento das proposicións presentadas polos licitadores ata a adxudicación e da proposición do adxudicatario ata a formalización do contrato.»

#### Artigo 48.

Dáselle nova redacción ó número 5:

«Artigo 48. *Devolución e cancelación das garantías definitivas.*

5. Nos casos das garantías constituídas ó abeiro dos artigos 37.4 e 84.5, unha vez practicada a recepción do contrato, procederase a substituí-la garantía no seu día constituída por outra polo importe a que se refire o artigo 37.1, que será cancelada de conformidade cos números 1 e 4 deste artigo.»

#### Artigo 53.

Dáselle nova redacción ó número 3:

«Artigo 53. *Orde para o establecemento de prescricións técnicas e prohibicións.*

3. Nos contratos sometidos a esta lei non poderán concorrer ás licitacións empresas que participasen na elaboración das especificacións técnicas relativas ós ditos contratos sempre que a dita participación poida provocar restricións á libre concorrencia ou supor un trato privilexiado con respecto ó resto das empresas licitadoras.»

#### Artigo 57.

Dáselle nova redacción ó artigo:

«Artigo 57. *Contratos menores.*

Nos contratos menores, que se definirán exclusivamente pola súa contía de conformidade cos artigos 121, 177 e 202, a tramitación do expediente só esixirá a aprobación do gasto e a incorporación a el da factura correspondente que reúna os requisitos regulamentariamente establecidos e no contrato menor de obras, ademais, o orzamento das obras, sen prexuízo da existencia de proxecto cando normas específicas así o requiriran.

Estes contratos non poderán ter unha duración superior a un ano, nin ser obxecto de prórroga nin de revisión de prezos.»

#### Artigo 58.

Dáselle nova redacción ó número 1:

«Artigo 58. *Remisión de contratos ó Tribunal de Contas.*

1. Dentro dos tres meses seguintes á formalización do contrato, para o exercicio da función fiscalizadora, o órgano de contratación remitiralle ó Tribunal de Contas ou órgano de fiscalización correspondente da comunidade autónoma, unha copia certificada do documento mediante o que se formalizase o contrato, acompañada dun extracto do expediente do que se derive, sempre que a contía do contrato exceda de 100.000.000 de

pesetas, tratándose de obras e de xestión de servizos públicos; de 75.000.000 de pesetas, tratándose de subministracións, e de 25.000.000 de pesetas, nos de consultoría e asistencia, nos de servizos e nos contratos administrativos especiais.»

#### Artigo 60.

Dáselle nova redacción á alínea 3.b):

«Artigo 60. *Prerrogativas da Administración.*

3. b) Modificacións do contrato, cando a contía delas, illada ou conxuntamente, sexa superior a un 20 por 100 do prezo primitivo do contrato e este sexa igual ou superior a 1.000.000.000 de pesetas.»

#### Artigo 62.

Dáselle nova redacción ó artigo:

«Artigo 62. *Invalidez dos contratos.*

Os contratos regulados nesta lei serán inválidos cando o sexa algún dos seus actos preparatorios ou o de adxudicación por concorren neles algunha das causas de dereito administrativo ou de dereito civil a que se refiren os artigos seguintes.»

#### Artigo 63.

Dáselle nova redacción ó artigo:

«Artigo 63. *Causas de nulidade de dereito administrativo.*

Son causas de nulidade de dereito administrativo as seguintes:

a) As indicadas no artigo 62.1 da Lei de réxime xurídico das administracións públicas e do procedemento administrativo común.

b) A falta de capacidade de obrar ou da solvencia económica, financeira, técnica ou profesional, debidamente acreditada, ou estar incurso o adxudicatario nalgunha das prohibicións ou incompatibilidades sinaladas no artigo 20 desta lei.

c) A carencia ou insuficiencia de crédito, de conformidade co establecido no artigo 60 da Lei xeral orzamentaria e as demais normas de igual carácter das restantes administracións públicas suxeitas a esta lei, agás os supostos de emerxencia.»

#### Artigo 65.

Dáselle nova redacción ó número 1:

«Artigo 65. *Declaración de nulidade.*

1. A declaración de nulidade dos contratos polas causas expresadas nos dous artigos precedentes poderá ser acordada polo órgano de contratación, de oficio ou por instancia dos interesados, de conformidade cos requisitos e prazos establecidos no artigo 102 da Lei de réxime xurídico das administracións públicas e do procedemento administrativo común.»

#### Artigo 68.

Dáselles nova redacción ós números 1 e 2 que integran o artigo:

«Artigo 68. *Expediente de contratación.*

1. Ós contratos en que a adxudicación se rexe por esta lei precederá a tramitación do expediente

de contratación que iniciará o órgano de contratación xustificando a necesidade dela. O expediente incorporaranse o prego de cláusulas administrativas particulares e o de prescricións técnicas particulares que teñan que rexe-lo contrato, con precisión do prazo de duración do contrato e, cando estiver prevista, da súa posible prórroga e alcance dela, que, en todo caso, terá de ser expresa, sen que poida prorrogarse o contrato por consentimento tácito das partes.

2. O expediente incorporaranse, sempre que o contrato orixine gastos para a Administración, o certificado de existencia de crédito ou documento que legalmente o substitúa, a fiscalización da intervención e a aprobación do gasto, agás no suposto excepcional previsto no artigo 86.a), nos termos previstos na Lei xeral orzamentaria ou nas correspondentes normas orzamentarias das restantes administracións públicas suxeitas a esta lei.»

#### Artigo 69.

Modifícase o título do artigo e dáselle nova redacción ó número 3:

«Artigo 69. *Fraccionamento do obxecto do contrato.*

3. Cando o obxecto admita fraccionamento, xustificándoo debidamente no expediente, poderá preverse nel a realización independente de cada unha das súas partes, mediante a súa división en lotes, sempre que estas sexan susceptibles de utilización ou aproveitamento separado ou así o esixa a natureza do obxecto.»

#### Artigo 70.

Dáselle nova redacción ó número 2:

«Artigo 70. *Aprobación do expediente.*

2. Nos contratos en que o financiamento teña que se realizar con achegas de distinta procedencia, aínda que se trate de órganos dunha mesma Administración pública, será tramitado un só expediente polo órgano de contratación ó que lle corresponda a adxudicación do contrato, debendo acreditarse naquel a plena dispoñibilidade de tódalas achegas e a orde do seu aboamento, con inclusión dunha garantía para a súa efectividade.»

#### Artigo 72.

Dáselle nova redacción á letra d) do número 2:

«Artigo 72. *Tramitación urgente.*

2. d) O prazo de inicio da execución do contrato non poderá ser superior a dous meses desde a data de adxudicación. En caso contrario o contrato quedará resolto, agás que o atraso se debese a causas alleas á Administración contratante e ó contratista e así se fixese constar na correspondente resolución motivada.»

#### Artigo 73.

Dáselle nova redacción ó número 1:

«Artigo 73. *Tramitación de urxencia.*

1. Cando a Administración teña que actuar de maneira inmediata por mor de acontecementos

catastróficos, de situacións que supoñan grave perigo ou de necesidades que afecten a defensa nacional haberá que se ater ó seguinte réxime excepcional:

a) O órgano de contratación competente, sen obriga de tramitar expediente administrativo, poderá ordena-la execución do necesario para remedia-lo acontecemento producido, satisface-la necesidade sobrevida ou contratar libremente o seu obxecto, en todo ou en parte, sen se suxeitar ós requisitos formais establecidos nesta lei, incluso o da existencia de crédito suficiente. O acordo correspondente irá acompañado da oportuna retención de crédito ou documentación que xustifique a iniciación do expediente de modificación de crédito. Dos ditos acordos daráselle conta no prazo máximo de sesenta días ó Consello de Ministros, se se trata da Administración xeral do Estado, dos seus organismos autónomos, entidades xestoras e servicios comúns da Seguridade Social ou demais entidades públicas estatais.

b) Asemade, o Ministerio de Economía e Facenda se se trata da Administración xeral do Estado, ou os representantes legais dos organismos autónomos e entidades xestoras e servicios comúns da Seguridade Social, autorizarán o libramento dos fondos precisos para lles facer fronte ós gastos, con carácter de "a xustificar".

c) Executadas as actuacións obxecto deste réxime excepcional, procederase a cumprilos trámites necesarios para a fiscalización e aprobación do gasto.»

#### Artigo 78.

Dáselle nova redacción ó artigo:

«Artigo 78. *Contía dos contratos en relación co imposto sobre o valor engadido.*

Sempre que no texto desta lei se faga alusión ó importe ou á contía dos contratos, entenderase que neles está incluído o imposto sobre o valor engadido, agás indicación expresa en contrario. As referencias ó imposto sobre o valor engadido deberán entenderse realizadas ó imposto xeral indirecto canario ou ó imposto sobre a produción, os servicios e a importación, nos territorios en que estas figuras impositivas rexan.»

#### Artigo 79.

Dáselle nova redacción ó número 2:

«Artigo 79. *Publicidade das licitacións.*

2. Nos procedementos abertos a publicación efectuarase cunha antelación mínima de quince días ó sinalado como o último para a admisión de proposicións. Emporiso, nos contratos de obras, o dito prazo será de vinteseis días.

Nos procedementos restrinxidos o prazo será de dez días anteriores ó último para a recepción das solicitudes de participación e o prazo para a presentación de proposicións será de quince días desde a data do envío da invitación escrita.

Nos procedementos negociados con publicidade, os prazos de recepción de solicitudes de participación deberán coincidir cos resultantes respecto da data do envío do anuncio do contrato á Oficina de Publicacións da Comunidade Europea e que se especifican nos artigos 140.2, 182.2 e 210.2.»

#### Artigo 80.

Dáselle nova redacción ó número 2 e engádesse un número 4, novo:

«Artigo 80. *Proposicións dos interesados.*

2. Deberán ir acompañadas, en sobre á parte, dos seguintes documentos:

a) Os que acrediten a personalidade xurídica do empresario e, se é o caso, a súa representación.

b) Os que acrediten a clasificación da empresa, se é o caso, ou xustifiquen os requisitos da súa solvencia económica, financeira e técnica ou profesional e unha declaración responsable de non estar incurso en prohibición de contratar, conforme os artigos 15 a 20.

A declaración responsable a que se refire o parágrafo anterior comprenderá expresamente a circunstancia de estar ó corrente do cumprimento das obrigas tributarias e coa Seguridade Social impostas polas disposicións vixentes, sen prexuízo de que a xustificación acreditativa de tal requisito deba esixirse antes da adxudicación ós que vaian resultar adxudicatarios do contrato; para este efecto concederáselles un prazo máximo de cinco días hábiles.

c) O xustificante acreditativo da garantía provisional.

d) Para as empresas estranxeiras, a declaración de someterse á xurisdicción dos xulgados e tribunais españois de calquera orde, para tódalas incidencias que de modo directo ou indirecto puidesen xurdir do contrato, con renuncia, se é o caso, ó foro xurisdiccional estranxeiro que lle puidese corresponder ó licitante.»

«4. Se durante a tramitación dos procedementos abertos e restrinxidos e antes da adxudicación se producise a extinción da personalidade xurídica dunha empresa licitadora ou candidata por fusión, escisión ou pola transmisión do seu patrimonio empresarial, sucederá na súa posición no procedemento a sociedade absorbente, a resultante da fusión, a beneficiaria da escisión ou a adquirente do patrimonio, sempre que reúna as condicións de capacidade e ausencia de prohibicións de contratar e acredite a solvencia e clasificación nas condicións esixidas no prego de cláusulas administrativas particulares para poder participar no procedemento de adxudicación.»

#### Artigo 81.

Dáselle nova redacción ó artigo:

«Artigo 81. *Proposicións simultáneas.*

Nas licitacións, cada licitador non poderá presentar máis dunha proposición, sen prexuízo do disposto no artigo 88 desta lei sobre admisibilidade de variantes. Tampouco poderá subscribir ningunha proposta en unión temporal con outros se o fixo individualmente ou figurar en máis dunha unión temporal. A infracción destas normas dará lugar á non-admisión de tódalas propostas por el subscritas.»

#### Artigo 82.

Dáselle nova redacción ó número 1:

«Artigo 82. *Mesa de contratación.*

1. Agás nos supostos previstos no artigo 12.4, o órgano de contratación para a adxudicación dos contratos por procedemento aberto ou restrinxido estará asistido por unha mesa constituída por un

presidente, os vocais que se determinen regulamentariamente, e un secretario designados polo órgano de contratación, o último entre funcionarios do propio órgano de contratación ou, no seu defecto, entre persoal ó seu servizo. No procedemento negociado, a constitución da mesa será potestativa para o órgano de contratación.

Na Administración xeral do Estado, nos seus organismos autónomos e entidades xestoras e servizos comúns da Seguridade Social, deberán figurar necesariamente entre os vocais un funcionario de entre os que teñan atribuído legal ou regulamentariamente o asesoramento xurídico do órgano de contratación e un interventor.»

#### Artigo 84.

Dáselles nova redacción á letra b) do número 2, ó número 3 e ó número 5.

«Artigo 84. *Adxudicación e baixas temerarias.*

b) Cando o órgano de contratación considere fundamentalmente que a proposición non poida ser cumprida como consecuencia de baixas desproporcionadas ou temerarias. Nestes casos solicitarase informe da Xunta Consultiva de Contratación Administrativa cando as circunstancias concorrentes así o aconsellen.

A mesa de contratación notificaralles aquela circunstancia ós interesados e o prazo indicado no parágrafo primeiro do número 1 deste artigo ampliarase ó dobre.

3. O carácter desproporcionado ou temerario das baixas apreciarase de acordo cos criterios obxectivos que se establezan regulamentariamente e a súa declaración requirirá a solicitude previa de información a tódolos licitadores supostamente comprendidos nela, así como o asesoramento técnico do servizo correspondente.

Para os efectos do parágrafo anterior, non poderán ser consideradas as diversas proposicións que formulen individualmente sociedades pertencentes a un mesmo grupo, nas condicións que regulamentariamente se determinen.»

«5. Cando a adxudicación se realice en favor do empresario a proposición do cal estivese incursa inicialmente en presunción de temeridade, exisirá-selle unha garantía definitiva do 20 por 100 do importe de adxudicación, de conformidade co disposto polo artigo 37.4.»

#### Artigo 86.

Dáselle nova redacción á letra b):

«Artigo 86. *Supostos de aplicación do concurso.*

b) Cando o órgano de contratación considere que a definición da prestación aprobada pola Administración é susceptible de ser mellorada por outras solucións técnicas, a proñoer polos licitadores mediante a presentación de variantes, ou por reducións no seu prazo de execución.»

#### Artigo 87.

Dáselle nova redacción ós números 1 e 2 e engádense os números 3 e 4, novos:

«Artigo 87. *Criterios para a adxudicación do concurso.*

1. Nos pregos de cláusulas administrativas particulares do concurso estableceranse os criterios

obxectivos que teñen que servir de base para a adxudicación, tales como o prezo, a fórmula de revisión, se é o caso, o prazo de execución ou entrega, o custo de utilización, a calidade, a rendibilidade, o valor técnico, as características estéticas ou funcionais, a posibilidade de repostos, o mantemento, a asistencia técnica, o servizo posvenda ou outros semellantes, de conformidade cos cales o órgano de contratación acordará aquela.

2. Os criterios ós que se refire o número anterior indícaranse por orde decrecente de importancia e pola ponderación que se lles atribúa e poderán concretar a fase de valoración das proposicións en que operarán estes e, se é o caso, o limiar mínimo de puntuación que na súa aplicación lle poida ser esixido ó licitador para continuar no proceso selectivo.

3. Nos contratos que se adxudiquen por concurso poderán expresarse no prego de cláusulas administrativas particulares os criterios obxectivos en función dos cales se apreciará, se é o caso, que a proposición non pode ser cumprida como consecuencia de ofertas desproporcionadas ou temerarias.

Se o prezo ofertado é un dos criterios obxectivos que han servir de base para a adxudicación, deberán expresarse no prego de cláusulas administrativas particulares os límites que permitan apreciar, se é o caso, que a proposición non pode ser cumprida como consecuencia de ofertas desproporcionadas ou temerarias.

4. Nos supostos recollidos no número anterior, haberá que se ater ó disposto, para as poxas, no artigo 84 no tocante á tramitación das proposicións e garantía que se constituirá, sen que as proposicións de carácter económico que formulen individualmente sociedades pertencentes a un mesmo grupo, nas condicións que regulamentariamente determinen, poidan ser consideradas para efectos de establece-lo prezo de referencia para valora-las ofertas económicas e identifica-las que deben considerarse como desproporcionadas ou temerarias.»

#### Artigo 88.

Dáselle nova redacción ó artigo:

«Artigo 88. *Admisibilidade de variantes.*

1. O órgano de contratación só poderá tomar en consideración as variantes ou alternativas que ofrezan os licitadores cando o prego de cláusulas administrativas particulares previse expresamente tal posibilidade. Neste suposto, o prego precisará sobre qué elementos e en qué condicións queda autorizada a presentación de variantes ou alternativas.

2. A circunstancia de autorización de variantes farase constar, ademais, no anuncio de licitación do contrato.»

#### Artigo 93.

Modifícase o título do artigo, dáselle nova redacción ó número 2 e engádense un número 3, novo:

«Artigo 93. *Aplicación do procedemento negociado.*

2. Cando se constituíse mesa de contratación, esta última elevaralle ó órgano de contratación unha proposta de adxudicación, sendo de aplicación o disposto con carácter xeral no artigo 82.

3. No prego de cláusulas administrativas particulares determinarase os aspectos económicos e técnicos que, se é o caso, teñan que ser obxecto de negociación coas empresas.

En todo caso, deberá deixarse constancia no expediente das invitacións cursadas, das ofertas recibidas e das razóns para a súa aceptación ou rexeitamento aplicadas polo órgano de contratación.»

#### Artigo 94.

Dáselles nova redacción ós números 2 e 3:

«Artigo 94. *Notificación e publicidade das adxudicacións.*

2. Cando o importe da adxudicación sexa igual ou superior a 10.000.000 de pesetas, publicarase no “Boletín Oficial del Estado” ou nos respectivos diarios ou boletíns oficiais das comunidades autónomas e entidades locais, en prazo non superior a corenta e oito días contados a partir da data de adxudicación do contrato, un anuncio no que se dea conta da dita adxudicación. Ademais, nos contratos suxeitos a publicidade obrigatoria no “Diario Oficial de las Comunidades Europeas” e nos de consultoría e asistencia e nos de servicios de contía igual ou superior á prevista no artigo 204.2, comprendidos nas categorías 17 a 27 das enumeradas no artigo 207, deberá enviarse ó citado “Diario Oficial” e ó “Boletín Oficial del Estado”, no mesmo prazo sinalado, un anuncio no que se dea conta do resultado da licitación, sen que nestes supostos exista a posibilidade de substituí-la publicidade no “Boletín Oficial del Estado” pola que comunidades autónomas e entidades locais poidan realizar no seus respectivos diarios ou boletíns oficiais.

3. Para os contratos de xestión de servicios públicos, a publicidade das adxudicacións no “Boletín Oficial del Estado” ou nos respectivos diarios ou boletíns oficiais será obrigatoria cando o orzamento de gastos de primeiro establecemento sexa igual ou superior a 10.000.000 de pesetas ou o seu prazo de duración exceda de cinco anos.»

#### Artigo 95.

Dáselle nova redacción ó artigo:

«Artigo 95. *Efectos dos contratos.*

Os efectos dos contratos administrativos rexeiranse por esta lei, polas súas disposicións de desenvolvemento e polos pregos de cláusulas administrativas e de prescricións técnicas, xerais e particulares.»

#### Artigo 96.

Dáselle nova redacción ós números 3, 4, 5 e engádese un novo número 6.

«Artigo 96. *Demora na execución ou incumprimento do obxecto do contrato.*

3. Cando o contratista, por causas imputables a el, incorrese en demora respecto ó cumprimento do prazo total, a Administración poderá optar indistintamente pola resolución do contrato ou pola imposición das penalidades diarias na proporción de 1 por cada 5.000 pesetas do prezo do contrato.

O órgano de contratación poderá acordala inclusión no prego de cláusulas administrativas parti-

culares dunhas penalidades distintas ás enumeradas no parágrafo anterior cando, atendendo ás especiais características do contrato, se considere necesario para a súa correcta execución e así se xustifique no expediente.

4. Cada vez que as penalidades por demora alcancen un múltiplo do 5 por 100 do prezo do contrato, o órgano de contratación estará facultado para proceder á resolución del ou acordala continuidade da súa execución con imposición de novas penalidades.

5. A Administración terá a mesma facultade a que se refire o número anterior respecto ó incumprimento por parte do contratista dos prazos parciais, cando se previse no prego de cláusulas administrativas particulares ou cando a demora no cumprimento daqueles faga presumir razoablemente a imposibilidade do cumprimento do prazo total.

6. Cando o contratista, por causas imputables a el, incumprise a execución parcial das prestacións definidas no contrato, a Administración poderá optar, indistintamente, pola súa resolución ou pola imposición das penalidades que, para tales supostos, se determinen no prego de cláusulas administrativas particulares.»

#### Artigo 100.

Dáselles nova redacción ós números 2 e 4 e engádese un novo número 7:

«Artigo 100. *Pagamento do prezo.*

2. O pagamento do prezo poderá facerse de maneira total ou parcialmente mediante aboamentos á conta.»

4. A Administración terá a obriga de aboalo prezo dentro dos dous meses seguintes á data da expedición das certificacións de obras ou dos correspondentes documentos que acrediten a realización total ou parcial do contrato, sen prexuízo do prazo especial establecido no número 4 do artigo 111, e se se demorase deberalle aboar ó contratista, a partir do cumprimento do dito prazo de dous meses, o xuro legal do diñeiro incrementado en 1,5 puntos, das cantidades debidas.»

7. Sen prexuízo do establecido nas normas tributarias e da Seguridade Social, os aboamentos á conta que procedan pola execución do contrato, só poderán ser embargados nos seguintes supostos:

a) Para o pagamento dos salarios devengados polo persoal do contratista na execución do contrato e das cotas sociais derivadas deles.

b) Para o pagamento das obrigas contraídas polo contratista cos subcontratistas e subministradores referidas á execución do contrato.»

#### Artigo 102.

Engádese un número 3, novo:

«Artigo 102. *Modificacións dos contratos.*

3. Nas modificacións dos contratos, aínda que fosen sucesivas, que impliquen illada ou conxuntamente alteracións en contía igual ou superior ó 10 por 100 do prezo primitivo do contrato, sempre que este sexa igual ou superior a 1.000.000.000 de pesetas con exclusión do imposto sobre o valor engadido, será preceptivo, ademais do informe a que se refire o número 2 do artigo 60 e da fiscalización previa nos termos da alínea 2.g) do artigo 11, o informe de contido orzamentario da Dirección

Xeral de Orzamentos do Ministerio de Economía e Facenda. Para tal efecto, os órganos de contratación remitirán o expediente correspondente á modificación proposta, ó que se incorporarán os seguintes documentos:

a) Unha memoria explicativa subscrita polo director facultativo da obra que xustifique a desviación producida que motiva a modificación, con expresión das circunstancias non previstas na aprobación do prego de prescricións técnicas e, se é o caso, no proxecto correspondente, documento que será expedido nos contratos distintos ós de obras polo servizo encargado da dirección e execución das prestacións contratadas.

b) Xustificación da improcedencia da convocatoria dunha nova licitación polas unidades ou prestacións constitutivas da modificación.

c) Nos contratos de obras, informe da Oficina de Supervisión de Proxectos sobre a adecuación da modificación proposta.

A Dirección Xeral de Orzamentos emitirá o seu informe no prazo de quince días hábiles.

O establecido neste número será tamén de aplicación nas modificacións consistentes na substitución de unidades obxecto do contrato por unidades novas en contratos cun importe de adjudicación que sexa igual ou superior a 1.000.000.000 de pesetas e as modificacións afecten o 30 por 100 ou máis do prezo primitivo do contrato, con exclusión do imposto sobre o valor engadido, independentemente das repercusións orzamentarias a que desen lugar as modificacións.»

#### Artigo 104.

Modifícase o título do artigo e dáselles nova redacción ós números 1 e 2:

«Artigo 104. *Revisión de prezos.*

1. A revisión de prezos nos contratos regulados nesta lei terá lugar nos termos establecidos neste título cando o contrato se executase no 20 por 100 do seu importe e transcorrese un ano desde a súa adjudicación, de tal modo que nin a porcentaxe do 20 por 100, nin o primeiro ano de execución, contando desde a dita adjudicación, poden ser obxecto de revisión.

2. En ningún caso terá lugar a revisión de prezos nos contratos en que o pagamento se concerte mediante o sistema de arrendamento financeiro ou de arrendamento con opción a compra a que se refire o artigo 14, nin nos contratos menores.»

#### Artigo 105.

Modifícase o título do artigo, dáselles nova redacción ós números 2 e 3 e engádese un novo número 4:

«Artigo 105. *Sistema de revisión de prezos.*

2. As fórmulas tipo reflectirán a participación no prezo do contrato da man de obra e dos elementos básicos.

Estas fórmulas deberán ser publicadas no “Boletín Oficial del Estado” e serán revisables cada dous anos, como mínimo. De entre as fórmulas tipo, o órgano de contratación, no prego de cláusulas administrativas particulares, determinará as que considere máis adecuadas ó respectivo contrato, sen prexuízo de que, se ningunha delas coincide coas características do contrato, se propoñan

as fórmulas especiais, que deberán ser igualmente aprobadas polo Consello de Ministros.

3. O índice ou fórmula de revisión aplicados ó contrato será invariable durante a vixencia deste e determinará a revisión de prezos en cada data respecto da data final de prazo de presentación de ofertas na poxa e no concurso e a da adjudicación no procedemento negociado.

4. A Comisión Delegada do Goberno para Asuntos Económicos aprobará os índices mensuais de prezos, que deberán ser publicados no “Boletín Oficial del Estado”.

Os índices reflectirán as oscilacións reais do mercado e poderán ser únicos para todo o territorio nacional ou determinarse por zonas xeográficas.»

#### Artigo 106.

Dáselle nova redacción ó artigo 106:

«Artigo 106. *Índices de prezos.*

As fórmulas de revisión servirán para calcular, mediante a aplicación de índices de prezos, os coeficientes de revisión en cada data respecto da data e períodos determinados no artigo 105.3, aplicándose os seus resultados ós importes líquidos das prestacións realizadas que teñan dereito a revisión.»

#### Artigo 111.

Dáselle nova redacción ó número 2 e engádese un número 4, novo:

«Artigo 111. *Cumprimento dos contratos e recepción.*

2. En todo caso, a súa constatación esixirá por parte da Administración un acto formal e positivo de recepción ou conformidade dentro do mes seguinte de se produci-la entrega ou realización do obxecto do contrato, ou no prazo que se determine no prego de cláusulas administrativas particulares por razón das características do obxecto do contrato. Á Intervención da Administración correspondente seralle comunicado, cando a dita comunicación sexa preceptiva, o acto para a súa asistencia potestativa a el nas súas funcións de comprobación do investimento.»

«4. Agás nos contratos de obras, que se rexerán polo disposto no artigo 147.3, dentro do prazo dun mes, contado desde a data da acta de recepción, deberá, se é o caso, acordarse e serlle notificada ó contratista a liquidación correspondente do contrato e aboárselle o saldo resultante. Se se producise demora no pagamento do saldo de liquidación, o contratista terá dereito a percibi-lo xuro legal do diñeiro incrementado en 1,5 puntos, a partir dos dous meses seguintes á liquidación.»

#### Artigo 113.

Dáselles nova redacción ós números 2 e 6:

«Artigo 113. *Aplicación das causas de resolución.*

2. A declaración de quebra, de concurso de acredores, de insolvente ou de falido en calquera procedemento orixinará sempre a resolución do contrato.

Nos restantes casos de resolución de contrato, o dereito para exercela será potestativo para aquela parte á que non lle sexa imputable a circunstancia que der lugar a ela, sen prexuízo de que nos supos-

tos de modificacións en máis do 20 por 100 previstos nos artigos 150.e), 193.c) e 214.c) a Administración tamén poida insta-la resolución.»

«6. Nos supostos de escisión, achega ou transmisión de empresas ou ramas dela continuará o contrato coa entidade resultante ou beneficiaria que quedará subrogada nos dereitos e obrigas dimanantes del, sempre que a entidade resultante ou beneficiaria manteña a solvencia esixida ó se acorda-la adxudicación.»

#### Artigo 115.

Dáselle nova redacción á letra c) do número 2:

«Artigo 115. *Cesión dos contratos.*

c) Que o cesionario teña capacidade para contratar coa Administración e a solvencia esixible de conformidade cos artigos 15 a 20, debendo estar debidamente clasificado se tal requisito lle foi esixido ó cedente.»

#### Artigo 116.

Dáselle nova redacción á letra b) do número 2 e ó número 4:

«Artigo 116. *Subcontratación.*

2. b) Que as prestacións parciais que o adxudicatario subcontrate con terceiros non excedan da porcentaxe que superior ó 50 por 100 do importe de adxudicación se fixe no prego de cláusulas administrativas particulares. No suposto de que tal previsión non figure no prego, o contratista poderá subcontratar ata unha porcentaxe que non exceda do indicado 50 por 100 do importe de adxudicación.»

«4. En ningún caso o contratista poderá concerta-la execución parcial do contrato con persoas inhabilitadas para contratar de acordo co ordenamento xurídico ou comprendidas nalgún dos supostos do artigo 20, con excepción da súa letra k), desta lei ou que estean incursas na suspensión de clasificacións.»

#### Artigo 116 bis.

Engádese un artigo novo co número 116 bis:

«Artigo 116 bis. *Pagamentos a subcontratistas e subministradores.*

A subscrición de subcontratos e de contratos de subministracións derivados dun contrato administrativo deberá cumprilos seguintes requisitos:

1. O contratista obrigarase a lle aboar ós subcontratistas ou subministradores o prezo pactado nos prazos e condicións que se indican a continuación.

2. Os prazos fixados serán determinados desde a data de aprobación polo contratista principal da factura emitida polo subcontratista ou o subministrador, con indicación da súa data e do período a que corresponda.

3. A aprobación ou conformidade deberá outorgarse nun prazo máximo de 30 días, desde a presentación da factura. Dentro do mesmo prazo deberán formularse, se é o caso, os motivos de desconformidade con ela.

4. Agás o que se dispón no seguinte número 5, o contratista deberá aboa-las facturas no prazo de 60 días desde a súa conformidade a elas. En caso de demora no pagamento, o subcontratista

ou o subministrador terá dereito ó cobramento de xuros. O tipo de xuro que se aplicará ás cantidades debidas será o legal do diñeiro, incrementado en 1,5 puntos.

5. Cando o prazo de pagamento se conveña máis alá dos 60 días establecidos no número anterior, o dito pagamento realizarase mediante un documento que leve implícita a acción cambiaria; e cando o prazo de pagamento supere os 120 días, poderá, ademais, ser esixido polo subcontratista ou subministrador que o dito pagamento se garanta mediante aval.

Os subcontratos e os contratos de subministracións a que se refire o parágrafo anterior terán, en todo caso, natureza privada.»

#### Artigo 117.

Engádese un número 5, novo:

«Artigo 117. *Contratos subscritos no estranxeiro.*

5. Nos contratos que sexan consecuencia da aplicación das disposicións do artigo 223 do Tratado Constitutivo da Comunidade Europea que subscriba o Ministerio de Defensa con empresas estranxeiras, así como os que se requiran para o cumprimento de misións de paz nas que participen as Forzas Armadas españolas, que se subscriban e executen no estranxeiro, a formalización dos contratos corresponderalle ó ministro de Defensa.»

#### Artigo 122.

Dáselle nova redacción ó artigo:

«Artigo 122. *Proxecto de obras.*

A adxudicación dun contrato de obras requirirá a previa elaboración, supervisión, se é o caso, aprobación e replanteo do correspondente proxecto que definirá con precisión o obxecto do contrato.

No suposto de adxudicación conxunta de proxecto e obra, a execución desta quedará condicionada á supervisión, aprobación e replanteo do proxecto pola Administración.»

#### Artigo 124.

Modifícase o título do artigo, dáselle unha nova redacción ó número 1 e engádese un número 5, novo:

«Artigo 124. *Contido dos proxectos e responsabilidade derivada da súa elaboración.*

1. Os proxectos de obras deberán comprender, polo menos:

a) Unha memoria na que se describa o obxecto das obras que recollerá os antecedentes e situación previa a elas, as necesidades que se pretendan satisfacer e a xustificación da solución adoptada, detallándose os factores de toda orde que se terán en conta.

b) Os planos de conxunto e de detalle necesarios para que a obra quede perfectamente definida, así como os que delimiten a ocupación de terreos e a restitución de servidumes e demais dereitos reais, se é o caso, e servicios afectados pola súa execución.

c) O prego de prescricións técnicas particulares onde se fará a descrición das obras e se regulará a súa execución, con expresión da forma en que esta se levará a cabo, da medición das unidades

executadas e o control de calidade e das obrigas de orde técnica que correspondan ó contratista.

d) Un orzamento, integrado ou non por varios parciais, con expresión dos prezos unitarios e dos descompostos, se é o caso, estado de medicións e os detalles precisos para a súa valoración.

e) Un programa de desenvolvemento dos traballos ou plan de obra de carácter indicativo, con previsión, se é o caso, do tempo e custo.

f) As referencias de todo tipo en que se fundamentará o replanteo da obra.

g) Canta documentación veña prevista en normas de carácter legal ou regulamentario.

h) O estudo de seguridade e saúde ou, se é o caso, o estudo básico de seguridade e saúde, nos termos previstos nas normas de seguridade e saúde nas obras.»

«5. Cando a elaboración do proxecto fose contratada integramente pola Administración, de acordo co artigo 197.2.a), o seu autor ou autores incorrerán en responsabilidade nos termos establecidos nos artigos 217 a 219. No suposto de a prestación se levar a cabo en colaboración coa Administración e baixo a súa supervisión, de acordo co artigo 197.2.b), as responsabilidades limitaranse ó ámbito da colaboración.»

#### Artigo 125.

Dáselle nova redacción ó artigo 125, dividíndoo en 5 números:

«Artigo 125. *Presentación do proxecto polo empresario.*

1. A contratación conxunta de elaboración de proxecto e execución das obras correspondentes terá carácter excepcional e só poderá aplicarse nos seguintes supostos:

a) Cando o sistema constructivo puidese resultar determinante das características esenciais do proxecto.

b) Cando as características das obras permitan anticipar diversos tratamentos de trazado, deseño e orzamento.

2. En todo caso, a licitación deste tipo de contrato requirirá a redacción previa pola Administración do correspondente anteprojecto ou documento similar e só, cando por causas xustificadas fose conveniente para o interese público, poderá limitarse a redacta-las bases técnicas a que o proxecto deba axustarse.

3. O contratista presentaralle o proxecto ó órgano de contratación para a súa supervisión, aprobación e replanteo. Se a Administración observar defectos ou referencias de prezos inadecuados no proxecto recibido, requirirá a súa emenda do contratista, nos termos do artigo 217, sen que ata ese momento e unha vez que se proceda á nova supervisión, aprobación e replanteo do proxecto, poida iniciarse a execución de obra. No suposto de o órgano de contratación e o contratista non chegaren a un acordo sobre os prezos, o último quedará exonerado de executa-las obras, sen outro dereito fronte ó órgano de contratación que o pagamento dos traballos de redacción do correspondente proxecto.

4. Nos casos a que se refire este artigo, a orde de iniciación do expediente e a reserva de crédito correspondente fixarán o importe estimado máximo que o futuro contrato pode alcanzar. Emporiso,

non se procederá á fiscalización do gasto, á súa aprobación, así como á adquisición do compromiso xerado por el, ata que non se coñeza o importe e as condicións do contrato de acordo coa proposición seleccionada, circunstancias que serán recollidas no correspondente prego de cláusulas administrativas particulares.

5. Cando se trate da elaboración dun proxecto de obras singulares de infraestruturas hidráulicas ou de transporte a entidade ou complexidade das cales non permita establece-lo importe estimativo da realización das obras, a previsión do prezo máximo a que se refire o número anterior limitarase exclusivamente ó proxecto. A execución da obra quedará supeditada ó estudio por parte da Administración da viabilidade do seu financiamento e á tramitación do correspondente expediente de gasto. No suposto de a Administración renunciar á execución da obra ou non se pronunciar nun prazo de tres meses, agás que o prego de cláusulas administrativas particulares establece outro maior, o contratista terá dereito ó pagamento do prezo do proxecto incrementado no 5 por 100 como compensación.»

#### Artigo 128.

Dáselle nova redacción ó artigo 128:

«Artigo 128. *Supervisión de proxectos.*

Antes da aprobación do proxecto, cando a súa contía sexa igual ou superior a 50.000.000 de pesetas, os órganos de contratación deberán solicitar un informe das correspondentes oficinas ou unidades de supervisión dos proxectos encargadas de verificar que se tiveron en conta as disposicións xerais de carácter legal ou regulamentario, así como a normativa técnica que resulte de aplicación para cada tipo de proxecto. A responsabilidade pola aplicación incorrecta delas nos diferentes estudos e cálculos esixírase de conformidade co disposto no artigo 124.5. Nos proxectos de contía inferior á sinalada, o informe terá carácter facultativo, agás que se trate de obras que afecten a estabilidade, seguridade ou estanquidade da obra; nestes supostos o informe de supervisión será igualmente preceptivo.»

#### Artigo 129.

Modifícase o título do artigo, dáselle nova redacción ó número 1 e engádense dous números novos que figurarán como números 2 e 3, respectivamente, pasando o actual número 2 a constituí-lo número 4:

«Artigo 129. *Replanteo do proxecto.*

1. Aprobado o proxecto e previamente á tramitación do expediente de contratación da obra, procederáse a efectua-lo seu replanteo, o cal consistirá en comproba-la realidade xeométrica dela e a dispoñibilidade dos terreos precisos para a súa normal execución, que será requisito indispensable para a adxudicación en tódolos procedementos. Así mesmo, deberánse comprobar cantos supostos figuren no proxecto elaborado e sexan básicos para o contrato que se vai subscribir.

2. Na tramitación dos expedientes de contratación referentes a obras de infraestruturas hidráulicas, de transporte e de estradas, dispensarase do requisito previo de dispoñibilidade dos terreos, se



ben a ocupación efectiva daqueles deberá ir precedida da formalización da acta de ocupación.

3. Nos casos de cesión de terreos ou locais por entidades públicas abondará, para acreditar a dispoñibilidade dos terreos, con achega-los acordos de cesión e aceptación polos órganos competentes.»

#### Artigo 130.

Dáselle nova redacción ó número 2 e engádesse un número 3, novo:

«Artigo 130. *Concepto do contrato de concesión.*

2. Sen prexuízo do disposto no artigo 6, o contrato de concesión de obras públicas queda suxeito ás normas de publicidade dos contratos de obras, coas especialidades previstas no artigo 139.

O concesionario deberá axustarse na explotación da obra ó establecido no artigo 162.

3. Sen prexuízo do disposto nos artigos 15 a 20 en canto a capacidade, solvencia e prohibicións de contratar dos empresarios, os que concorran, individualmente ou conjuntamente con outros, á licitación dunha concesión de obra pública poderán facelo co compromiso de constituír unha sociedade, que será a titular da concesión, no prazo e cos requisitos e condicións que estableza o prego de cláusulas administrativas particulares, sen serlles de aplicación os límites establecidos no artigo 282 do texto refundido da Lei de sociedades anónimas, aprobado polo Real decreto lexislativo 1564/1989, do 22 de decembro, e no artigo 185 do Código de comercio.»

#### Artigo 131.

Dáselle nova redacción ó artigo:

«Artigo 131. *Subcontratación parcial nas concesións de obras públicas.*

No contrato de concesión de obras públicas, a Administración poderalle impor ó concesionario que subcontrate con terceiros unha porcentaxe dos contratos de obras obxecto da concesión que represente, polo menos, un 30 por 100 do valor total das ditas obras, debendo preverse que os licitadores poidan incrementalalo facendo consta-la súa cifra no contrato. Alternativamente, poderán convidar estes para sinalaren nas súas ofertas a porcentaxe mínima que vaian subcontratar con terceiros.»

#### Artigo 135.

Dáselle nova redacción ó número 1:

«Artigo 135. *Supostos de publicidade.*

1. En cada exercicio orzamentario, os órganos de contratación darán a coñecer, mediante un anuncio indicativo, as características básicas dos contratos de obras que teñan proxectado subscribir nos próximos doce meses, calquera que sexa o procedemento de adxudicación que apliquen e sempre que o seu importe, con exclusión do imposto sobre o valor engadido, sexa igual ou superior a 836.621.683 pesetas.

Este anuncio enviaráselle o antes posible a partir da súa programación á Oficina de Publicacións Oficiais das Comunidades Europeas e, para que produza o efecto de redución de prazos previsto nos

artigos 137 e 138, deberá terse enviado á citada oficina cunha antelación mínima de cincuenta e dous días e máxima de doce meses a partir da data do envío do anuncio do contrato ó “Diario Oficial das Comunidades Europeas”.»

#### Artigo 137.

Dáselle nova redacción ó artigo:

«Artigo 137. *Prazos para a presentación de proposicións.*

No procedemento aberto, o prazo de presentación de proposicións non será inferior a cincuenta e dous días contados a partir da data do envío do anuncio do contrato á Oficina de Publicacións Oficiais das Comunidades Europeas.

Se, nos prazos previstos, se enviase o anuncio indicativo a que se refire o artigo 135.1, o prazo de presentación de proposicións reducirase a trinta e seis días, como norma xeral, sen que, en ningún caso, esta redución poida ser inferior a vintedous días.»

#### Artigo 141.

Dáselles nova redacción ás letras d) e g):

«Artigo 141. *Procedemento negociado sen publicidade.*

d) Cando se trate de obras complementarias que non figuren no proxecto, nin no contrato, pero que resulte necesario executar como consecuencia de circunstancias imprevistas, e a súa execución se lle confíe ó contratista da obra principal de acordo cos prezos que rexen para o contrato primitivo ou que, se é o caso, fosen fixados contradictoriamente.

Para a aplicación do establecido no parágrafo anterior deberán concorre-los seguintes requisitos respecto do contrato principal:

1. Que as obras non poidan separarse técnica ou economicamente do contrato primitivo sen causar inconvenientes maiores á Administración ou que, aínda que se poidan separar da execución do dito contrato, sexan estritamente necesarias para a súa execución.

2. Que as obras complementarias que se vaian executar definidas no correspondente proxecto estean formadas, polo menos, nun 50 por 100 do orzamento, por unidades de obra do contrato principal.

3. Que o importe acumulado das obras complementarias non supere o 20 por 100 do prezo primitivo do contrato.

As demais obras complementarias que non reúnan os requisitos esixidos nos parágrafos precedentes terán que ser obxecto de contratación independente.»

«g) Os de orzamento inferior a 10.000.000 de pesetas.»

#### Artigo 145.

Dáselle nova redacción ós números 1 e 2 que integran o artigo:

«Artigo 145. *Certificacións e aboamentos a conta.*

1. Para os efectos do pagamento, a Administración expedirá mensualmente, nos primeiros dez días seguintes ó mes ó que correspondan, certi-

ficacións que comprendan a obra executada durante o dito período de tempo, agás prevención en sentido contrario no prego de cláusulas administrativas particulares. O aboamentos teñen o concepto de pagamentos á conta suxeitos ás rectificacións e variacións que se produzan na medición final e sen supor de ningunha forma aprobación e recepción das obras que comprenden.

2. O contratista terá tamén dereito a percibir aboamentos á conta sobre o seu importe polas operacións preparatorias realizadas, como instalacións e fornecemento de materiais ou equipos de maquinaria pesada adscritos á obra, nas condicións que se sinalen nos respectivos pregos de cláusulas administrativas particulares e conforme o réxime e os límites que con carácter xeral se determinen regulamentariamente, debendo aseguralos referidos pagamentos mediante a prestación de garantía.»

#### Artigo 146.

Dáselles nova redacción ós números 2 e 4:

«Artigo 146. *Modificación do contrato de obras.*

2. Cando as modificacións supoñan a introdución de unidades de obra non comprendidas no proxecto ou cunhas características que difiran substancialmente delas, os prezos de aplicación daquelas serán fixados pola Administración, á vista da proposta do director facultativo das obras e das observacións do contratista a esta proposta en trámite de audiencia, por prazo mínimo de tres días hábiles. Se este non aceptase os prezos fixados, o órgano de contratación poderá contratatalas con outro empresario nos mesmos prezos que fixase ou executatalas directamente. A contratación con outro empresario poderá realizarse polo procedemento negociado sen publicidade sempre que o seu importe non exceda do 20 por 100 do prezo primitivo do contrato.»

«4. Cando a tramitación dun modificado esixa a suspensión temporal parcial ou total da execución das obras e iso ocasione graves prexuízos para o interese público, o ministro, se se trata da Administración xeral do Estado, os seus organismos autónomos, entidades xestoras e servicios comúns da Seguridade Social e demais entidades públicas estatais, poderá acordar que continúen provisionalmente as obras tal e como estea previsto na proposta técnica que elabore a dirección facultativa, sempre que o importe máximo previsto non supere o 20 por 100 do prezo primitivo do contrato e exista crédito adecuado e suficiente para o seu financiamento.

O expediente que se tramitará para o efecto esixirá exclusivamente as seguintes actuacións:

- a) Proposta técnica motivada efectuada polo director facultativo da obra, onde figurará o importe aproximado da modificación, así como a descrición básica das obras que se van realizar.
- b) Audiencia do contratista.
- c) Conformidade do órgano de contratación.
- d) Certificado de existencia de crédito.

No prazo de seis meses deberá estar aprobado tecnicamente o proxecto e no de oito meses, o expediente do modificado.

Dentro do citado prazo de oito meses executaranse preferentemente, das unidades de obra previstas no contrato, aquelas partes que non teñan que quedar posterior e definitivamente ocultas. A autorización do ministro para iniciar provisional-

mente as obras, que non poderá ser obxecto de delegación, implicará no ámbito da Administración xeral do Estado, dos seus organismos autónomos e das entidades xestoras e servicios comúns da Seguridade Social a aprobación do gasto, sen prexuízo dos axustes que deban efectuarse no momento da aprobación do expediente do gasto.»

#### Artigo 147.

Engádese un segundo parágrafo no número 1, dáselle nova redacción ó número 3 e engádese un número 6, novo:

«Artigo 147. *Recepción e prazo de garantía.*

1. Á recepción das obras ó seu remate e para os efectos establecidos no artigo 111.2 concorrerá un facultativo designado pola Administración representante desta, o facultativo encargado da dirección das obras e o contratista asistido, se o estima oportuno, do seu facultativo.

Dentro do prazo de dous meses contados a partir da recepción, o órgano de contratación deberá aproba-la certificación final das obras executadas, que lle será aboada ó contratista á conta da liquidación do contrato.»

«3. O prazo de garantía establecerase no prego de cláusulas administrativas particulares, atendendo á natureza e complexidade da obra e non poderá ser inferior a un ano, agás casos especiais.

Dentro do prazo de quince días anteriores ó cumprimento do prazo de garantía, o director facultativo da obra, de oficio ou por instancia do contratista, redactará un informe sobre o estado das obras. Se este for favorable, o contratista quedará relevado de toda responsabilidade, agás o disposto no artigo 149, e procederase á devolución ou cancelación da garantía e á liquidación, se é o caso, das obrigas pendentes, aplicándose ó pagamento destas últimas o disposto no artigo 100.4. No caso de o informe non ser favorable e os defectos observados se deberen a deficiencias na execución da obra e non ó uso do construído, durante o prazo de garantía o director facultativo procederá a lle dicta-las oportunas instrucións ó contratista para a debida reparación do construído, concedéndolle un prazo para iso durante o cal continuará encargado da conservación das obras, sen dereito a percibir ningunha cantidade por ampliación do prazo de garantía.

6. Sempre que por razóns excepcionais de interese público debidamente motivadas no expediente o órgano de contratación acorde a ocupación efectiva das obras ou a súa posta en servicio para o uso público, mesmo sen o cumprimento do acto formal de recepción, desde que concorran as ditas circunstancias produciranse os efectos e consecuencias propios do acto de recepción das obras e nos termos en que regulamentariamente se establezan.»

#### Artigo 148.

Queda sen contido.

#### Artigo 150.

Dáselles nova redacción ás letras c) e e):

«Artigo 150. *Causas de resolución.*

c) A desistencia ou a suspensión das obras por un prazo superior a oito meses acordada pola Administración.»

«e) As modificacións no contrato, aínda que fosen sucesivas, que impliquen, illada ou conxuntamente, alteracións do prezo do contrato, en contía superior, en máis ou en menos, ó 20 por 100 do prezo primitivo do contrato, con exclusión do imposto sobre o valor engadido, ou representen unha alteración substancial do proxecto inicial.»

#### Artigo 151.

Dáselle nova redacción ó número 1:

«Artigo 151. *Alteración substancial e suspensión da iniciación das obras.*

1. En relación coa letra e) do artigo anterior considerárase alteración substancial, entre outras, a modificación dos fins e características básicas do proxecto inicial, así como a substitución de unidades que afecten, polo menos, ó 30 por 100 do prezo primitivo do contrato, con exclusión do imposto sobre o valor engadido.»

#### Artigo 152.

Dáselles nova redacción ós números 2 e 4.

«Artigo 152. *Efectos da resolución.*

2. Se se demorase a comprobación do replanteo, segundo o artigo 142, dando lugar á resolución do contrato, o contratista só terá dereito a unha indemnización equivalente ó 2 por 100 do prezo da adxudicación.»

«4. En caso de desistencia ou suspensión das obras iniciadas por prazo superior a oito meses, o contratista terá dereito ó 6 por 100 do prezo das obras deixadas de realizar en concepto de beneficio industrial, entendéndose por obras deixadas de realizar as que resulten da diferenza entre as reflectidas no contrato primitivo e as súas modificacións e as que ata a data de notificación da suspensión se executasen.»

#### Artigo 153. Dáselles nova redacción ós números 1, letra g), e ós números 3 e 4:

«Artigo 153. *Supostos.*

1. A execución de obras pola Administración poderá ser verificada polos propios servicios dela a través dos seus medios persoais ou reais ou coa colaboración de empresarios particulares, sempre que neste último caso o seu importe sexa inferior a 836.621.683 pesetas, con exclusión do imposto sobre o valor engadido, cando concorran algunhas destas circunstancias:»

«g) As obras de mera conservación e mantemento nos termos definidos no artigo 123.5 desta lei.»

«3. Cando a execución das obras se efectúe mediante contratos de colaboración con empresarios particulares, estes contratos terán carácter administrativo, pero non constituirán contrato de obras, xa que a execución destas estará a cargo do órgano xestor da Administración. A selección do empresario colaborador efectuarase polos procedementos e formas de adxudicación establecidos nos artigos 74 e 75 desta lei.

4. Nos supostos das letras a) e b) do número 1 deste artigo non poderá superarse na contratación con colaboradores o 50 por 100 do importe total do proxecto.»

#### Artigo 154.

Dáselle nova redacción ó artigo:

«Artigo 154. *Autorización para a execución de obras.*

A autorización da execución de obras e, se é o caso, a aprobación do proxecto na Administración xeral do Estado, nos seus organismos autónomos, nas entidades xestoras e servicios comúns da Seguridade Social e nas demais entidades públicas estatais, corresponderalle ó órgano competente para a aprobación do gasto.»

#### Artigo 155.

Dáselle nova redacción ó número 2:

«Artigo 155. *Réxime xeral.*

2. Non serán aplicables as disposicións deste título ós supostos en que a xestión do servicio público se efectúe mediante a creación de entidades de dereito público destinadas para este fin, nin a aqueles en que tal xestión se lle atribúa a unha sociedade de dereito privado no capital da cal sexa exclusiva a participación da Administración ou a dun ente público desta.»

#### Artigo 157.

Dáselle nova redacción á letra a):

«Artigo 157. *Modalidades da contratación.*

a) Concesión, pola que o empresario xestionará o servicio ó seu propio risco e ventura, sendo aplicable neste caso o previsto no número 3 do artigo 130 desta lei.»

#### Artigo 158.

Dáselle nova redacción ó artigo:

«Artigo 158. *Duración.*

O contrato de xestión de servicios públicos non poderá ter carácter perpetuo ou indefinido; no prego de cláusulas administrativas particulares fíxase necesariamente a súa duración e a das prórrogas de que poida ser obxecto, sen que poida exceder do prazo total, incluídas as prórrogas, dos seguintes períodos:

a) Cincuenta anos nos contratos que comprendan a execución de obras e a explotación de servicio público.

b) Vintecinco anos nos contratos que comprendan a explotación dun servicio público non relacionado coa prestación de servicios sanitarios.

c) Dez anos nos contratos que comprendan a explotación dun servicio público que teña por obxecto a prestación de servicios sanitarios sempre que non estean comprendidos na letra a).»

#### Artigo 159.

Dáselle nova redacción ó artigo:

«Artigo 159. *Actuacións preparatorias do contrato.*

1. Todo contrato de xestión de servicios públicos irá precedido da aprobación do prego de cláusulas administrativas particulares e do de prescricións técnicas, especificando o réxime xurídico básico regulador do servicio a que se refire o arti-

go 156 e os regulamentos especiais reguladores del, así como os aspectos de carácter xurídico, económico e administrativo e, se é o caso, as tarifas que tiveren de percibirse dos usuarios, os procedementos para a súa revisión e o canon ou participación que tiver que se lle satisfacer á Administración, cando así proceda.

2. Nos contratos que comprendan a execución de obras a tramitación do expediente irá precedida da elaboración e aprobación administrativa do anteproxecto de explotación e das obras precisas, con especificación das prescricións técnicas relativas á súa realización. En tal suposto serán de aplicación os preceptos establecidos nesta lei para a concesión de obras públicas.

3. Nos contratos relativos á prestación de asistencia sanitaria motivada por supostos de urxencia, por importe inferior a 2.000.000 de pesetas, as disposicións desta lei non serán de aplicación á preparación e adxudicación do contrato.

Para acreditar a existencia dos contratos a que se refire este punto, abondará, ademais da xustificación da urxencia que hai que realizar, a determinación do obxecto da prestación, a fixación do prezo que se satisfará por ela e a designación polo órgano de contratación da empresa que efectuará a correspondente prestación.»

#### Artigo 160.

Dáselle nova redacción ó encabezamento e á letra d) do número 2.

«Artigo 160. *Procedementos e formas de adxudicación.*

2. O procedemento negociado só poderá ter lugar, logo de xustificación razoada no expediente e acordo do órgano de contratación, nos supostos seguintes:»

«d) Os de xestión de servizos dos que o orzamento de gastos de primeiro establecemento se prevexa inferior a 5.000.000 de pesetas e o seu prazo de duración sexa inferior a cinco anos.»

#### Artigo 161.

Dáselle nova redacción ó artigo:

«Artigo 161. *Execución do contrato.*

O contratista está obrigado a organizar e prestar-lo servizo con estrita suxeición ás características establecidas no contrato e dentro dos prazos sinalados nel, e, se é o caso, á execución das obras conforme o proxecto aprobado polo órgano de contratación.»

#### Artigo 172.

Dáselle nova redacción ó artigo:

«Artigo 172. *Concepto.*

Para os efectos desta lei entenderase por contrato de subministración o que teña por obxecto a compra, o arrendamento financeiro, o arrendamento con ou sen opción de compra, ou a adquisición de produtos ou bens mobles, agás os relativos a propiedades incorporais e valores negociables que se rexerán pola lexislación patrimonial das administracións públicas aplicable a cada caso.»

#### Artigo 173.

Dáselle unha nova redacción á letra b) do número 1:

«Artigo 173. *Contratos considerados como de subministración.*

b) A adquisición e o arrendamento de equipos e sistemas para o tratamento da información, os seus dispositivos e programas e a cesión do dereito de uso destes últimos, así como de equipos e sistemas de telecomunicacións.»

#### Artigo 174.

Dáselle nova redacción ó título do artigo e engádese unha letra e), nova:

«Artigo 174. *Tratamento da información e telecomunicacións.*

e) Por equipos e sistemas de telecomunicacións enténdense o conxunto de dispositivos que permiten a transferencia, transporte e intercambio de información conforme a determinadas regras técnicas e a través de medios electrónicos, informáticos e telemáticos.»

#### Artigo 176.

Modifícase o título do artigo e dáselle nova redacción ó número 2:

«Artigo 176. *Contratos de fabricación e aplicación de normas e usos vixentes en comercio internacional.*

2. Os contratos que se subscriban con empresas estranxeiras de estados non pertencentes á Comunidade Europea cando o seu obxecto se fabrique ou proceda de fóra do territorio nacional e os de subministración que sexan consecuencia da aplicación das disposicións do artigo 223.1.b) do Tratado Constitutivo da Comunidade Europea, que subscriba o Ministerio de Defensa con empresas estranxeiras, rexeranse por esta lei, sen prexuízo do que se conveña entre as partes de acordo coas normas e usos vixentes no comercio internacional.»

#### Artigo 177.

Modifícase o título do artigo, que mantén a mesma redacción:

«Artigo 177. *Contratos menores.*»

#### Artigo 178.

Dáselle nova redacción ós números 1 e 2 que integran o artigo:

«Artigo 178. *Supostos de publicidade.*

1. Os órganos de contratación darán a coñecer, mediante un anuncio indicativo, os contratos totais por grupos de produtos dun importe, con exclusión do imposto sobre o valor engadido, igual ou superior a 121.825.156 pesetas, e que teñan previsto subscribir durante os doce meses seguintes.

Este anuncio enviarase o antes posible a partir da súa programación á Oficina de Publicacións Oficiais das Comunidades Europeas e, para que produza o efecto de redución de prazos previsto nos artigos 179 e 180, deberá terse enviado á citada oficina cunha antelación mínima de cincuenta e

dous días e máxima de doce meses a partir da data do envío do anuncio do contrato ó “Diario Oficial das Comunidades Europeas”.

2. Ademais, nos casos de procedemento aberto, restrinxido ou negociado do artigo 182 deberá publicarse un anuncio no “Diario Oficial das Comunidades Europeas” cando a contía do contrato de subministración, con exclusión do imposto sobre o valor engadido, sexa igual ou superior a 33.464.867 pesetas, ou a 21.752.164 pesetas, cando neste último suposto sexa adxudicado polos órganos de contratación da Administración xeral do Estado, polos seus organismos autónomos, polas entidades xestoras e polos servicios comúns da Seguridade Social e demais entidades públicas estatais. Non embargante, non terán que publicarse no citado diario os contratos que sexan consecuencia da aplicación das disposicións do artigo 223.1.b) do Tratado Constitutivo da Comunidade Europea.»

#### Artigo 179.

Modifícase o título do artigo e dáselle nova redacción:

«Artigo 179. *Prazos de presentación de proposicións no procedemento aberto.*

No procedemento aberto o prazo de presentación de proposicións non poderá ser inferior a cincuenta e dous días a partir da data do envío do anuncio do contrato á Oficina de Publicacións Oficiais das Comunidades Europeas.

Se, nos prazos previstos, se enviase o anuncio indicativo a que se refire o artigo 178.1, o prazo de presentación de proposicións reducirase a trinta e seis días, como norma xeral, sen que, en ningún caso, esta redución poida ser inferior a vintedous días.»

#### Artigo 183.

Dáselles nova redacción ás letras a), f) e i), e engádense as letras k) e l), novas:

«Artigo 183. *Procedemento negociado sen publicidade.*

a) Cando o contrato non chegase a adxudicarse nun procedemento aberto ou restrinxido por falta de licitadores ou porque os presentados non fosen admitidos a licitación, sempre que non se modifiquen as condicións orixinais do contrato, agás o prezo, que non poderá ser aumentado en máis dun 10 por 100. Neste suposto remitiráselle un informe á Comisión da Comunidade Europea, por petición desta, cando a contía do contrato sexa igual ou superior ós límites sinalados no artigo 178.2.»

f) Os que sexan consecuencia da aplicación das disposicións do artigo 223.1.b) do Tratado Constitutivo da Comunidade Europea, que deba subscribi-lo Ministerio de Defensa con empresas estranxeiras, cando non existan empresas nacionais capacitadas para executalo.»

i) Os de bens de contía inferior a 5.000.000 de pesetas, límite que se eleva a 8.000.000 de pesetas, para os supostos comprendidos no artigo 173.1.c)»

k) Os de adquisición de produtos consumibles, perecedoiros ou de fácil deterioración, de contía inferior a 10.000.000 de pesetas.

l) Nas adxudicacións dos contratos que sexan consecuencia dun acordo ou contrato marco, sempre que este último fose adxudicado con suxeición ás normas desta lei.»

#### Artigo 184.

Dáselle nova redacción ó artigo, dividíndoo en dous números:

«Artigo 184. *Contratación centralizada de bens.*

1. No ámbito da Administración xeral do Estado, os seus organismos autónomos, entidades xestoras e servicios comúns da Seguridade Social e demais entidades públicas estatais, o ministro de Economía e Facenda poderá declarar de adquisición centralizada o mobiliario, material e equipo de oficina e outros bens. En relación cos citados bens, a Dirección Xeral do Patrimonio do Estado subscribirá os concursos para a adopción de tipo e, se é o caso, os acordos ou contratos marco. Regulamentariamente, fixarase o procedemento para a adquisición dos referidos bens.

2. A adquisición de equipos e sistemas para o tratamento da información e dos seus elementos complementarios ou auxiliares corresponderalle á Dirección Xeral do Patrimonio do Estado, oídos os departamentos ministeriais en canto ás súas necesidades, coas excepcións previstas nesta lei e as que se fixen regulamentariamente.»

#### Artigo 188.

Dáselle nova redacción ó número 1:

«Artigo 188. *Pagamento en metálico e noutros bens.*

1. Cando razóns técnicas ou económicas debidamente xustificadas no expediente o aconsellen, poderá establecerse no prego de cláusulas administrativas particulares que o pagamento do prezo total dos bens que se vaian subministrar consista parte en diñeiro e parte na entrega doutros bens da mesma clase, sen que, en ningún caso, o importe destes poida supera-lo 50 por 100 do prezo total. Para estes efectos, o compromiso de gasto correspondente limitarase ó importe que do prezo total do contrato non se satisfaga mediante a entrega de bens ó contratista, sen que teña aplicación o disposto no artigo 58 da Lei xeral orzamentaria, no artigo 146.3 da Lei 39/1988, do 28 de decembro, reguladora das facendas locais, ou nas normas orzamentarias das distintas administracións públicas suxeitas a esta lei.»

#### Artigo 193.

Dáselle nova redacción á letra c):

«Artigo 193. *Causas de resolución.*

c) As modificacións no contrato, aínda que fosen sucesivas, que impliquen, illada ou conxuntamente, alteracións do prezo do contrato en contía superior, en máis ou en menos, ó 20 por 100 do prezo primitivo do contrato, con exclusión do imposto sobre o valor engadido, ou representen unha alteración substancial da prestación inicial.»

#### Artigo 195.

Dáselle nova redacción ó número 2:

«Artigo 195. *Supostos.*

2. Cando a fabricación do ben moble se efectúe mediante contratos de colaboración con empresarios particulares, estes contratos terán carácter

administrativo, pero non constituirán contrato de subministración, xa que a fabricación dos bens estará a cargo do órgano xestor da Administración. A selección do empresario colaborador efectuarase polos procedementos establecidos nos artigos 74 e 75 desta lei.»

#### Artigo 196.

Modifícase o título do artigo e dáselle nova redacción:

«Artigo 196. *Autorización para a fabricación de bens mobles.*

A autorización da fabricación de bens mobles e, se é o caso, a aprobación do proxecto, na Administración xeral do Estado, os seus organismos autónomos, as entidades xestoras e servicios comúns da Seguridade Social e demais entidades públicas estatais, corresponderalle ó órgano competente para a aprobación do gasto.»

## LIBRO II

### TÍTULO IV

Modifícase a denominación do título IV:

#### «TÍTULO IV

#### **Dos contratos de consultoría e asistencia e dos de servicios»**

#### Artigo 197.

Dáselle nova redacción ós números 1, 2 e 3 e suprímese o número 4, pasando o actual número 5 a figurar como número 4:

«Artigo 197. *Concepto.*

1. Os contratos de consultoría e asistencia e os de servicios que subscriba a Administración rexeranse por esta lei.

2. Son contratos de consultoría e asistencia aqueles que teñan por obxecto:

a) Estudiar e elaborar informes, estudos, plans, anteproxectos, proxectos de carácter técnico, organizativo, económico ou social, así como a dirección, supervisión e control da execución e mantemento de obras, instalacións e da implantación de sistemas organizativos.

b) Levar a cabo, en colaboración coa Administración e baixo a súa supervisión, as seguintes prestacións:

Investigación e estudos para a realización de calquera traballo técnico.

Asesoramento para a xestión de bens públicos e organización de servicios do mesmo carácter.

Estudio e asistencia na redacción de proxectos, anteproxectos, modificación duns e outros, dirección, supervisión e control da execución e mantemento de obras e instalacións e da implantación de sistemas organizativos.

Calquera outra prestación directa ou indirectamente relacionadas coas anteriores e nas que tamén predominen as de carácter intelectual, en particular, os contratos que a Administración subscriba con profesionais, en función da súa titulación académica, así como os contratos para o desenvolvemento de actividades de formación do persoal das administracións públicas.

3. Son contratos de servicios aqueles nos que a realización do seu obxecto sexa:

a) De carácter técnico, económico, industrial, comercial ou calquera outro de natureza análoga, sempre que non se encontren comprendidos nos contratos de consultoría e asistencia ou nalgún dos regulados noutros títulos deste libro.

b) Complementario para o funcionamento da Administración.

c) De mantemento, conservación, limpeza e reparación de bens, equipos e instalacións.

d) Os programas de ordenador desenvolvidos á medida para a Administración, que serán de libre utilización por esta.

e) A realización de enquisas, tomas de datos e outros servicios análogos.

Non poderán subscribirse contratos de servicios con empresas de traballo temporal, agás o suposto expresado na letra e) e só cando se precise a posta á disposición da Administración de persoal con carácter eventual. En tal suposto, vencido o prazo a que se refire o artigo 199.3, non poderá producirse a consolidación como persoal das administracións públicas das persoas que, procedentes das citadas empresas, realicen os traballos que constitúan o obxecto do contrato, sen que sexa de aplicación, para tal efecto, o establecido no artigo 7.2 da Lei 14/1994, do 1 de xuño, pola que se regulan as empresas de traballo temporal.»

#### Artigo 198.

Suprímese o número 2, pasando o actual número 3 a figurar como número 2 co seguinte texto:

«Artigo 198. *Requisitos de capacidade e compatibilidade.*

2. Os contratos de consultoría e asistencia que teñan por obxecto a vixilancia, supervisión, control e dirección da execución de obras e instalacións, agás que os pregos dispoñan expresa e xustificadamente o contrario, non poderán adjudicarse ás mesmas empresas adjudicatarias dos correspondentes contratos de obras nin ás empresas vinculadas a estas no sentido en que son definidas no artigo 134.»

#### Artigo 199.

Dáselle nova redacción ós números 1 e 3 e suprímese o número 2, pasando o actual número 3 a figurar como número 2. Por outra parte, engádese un número 3, novo:

«Artigo 199. *Duración.*

1. Os contratos de consultoría e asistencia e os de servicios non poderán ter un prazo de vixencia superior a dous anos coas condicións e límites establecidos nas respectivas normas orzamentarias das administracións públicas, se ben poderá preverse no mesmo contrato a súa modificación e a súa prórroga por mutuo acordo das partes antes da finalización daquel, sen que a duración total do contrato, incluídas as prórrogas, poida exceder de catro anos, nin estas poidan ser concertadas, illada ou conxuntamente, por un prazo superior ó fixado orixinariamente.

2. Malia o disposto anteriormente, os contratos regulados neste título que sexan complementarios de contratos de obras ou de subministración poderán ter un prazo superior de vixencia que, en ningún caso, excederá do prazo de duración do contrato

principal, agás nos contratos que comprenden traballos relacionados coa liquidación do contrato principal, en que o prazo final excederá ó daquel no tempo necesario para realízalos. A iniciación do contrato complementario a que se refire este número quedarán en suspenso, agás causa xustificada derivada do seu obxecto e contido, ata que comece a execución do correspondente contrato de obras.

Soamente terán o concepto de contratos complementarios aqueles que teñan un obxecto que se considere necesario para a correcta realización da prestación ou prestacións obxecto do contrato principal.

3. Os contratos ós que se refire o parágrafo derradeiro do número 3 do artigo 197 en ningún caso poderán supera-lo prazo de seis meses, extinguíndose ó seu vencemento sen posibilidade de prórroga.»

#### Artigo 200.

Dáselle nova redacción ó artigo:

«Artigo 200. *Contratación centralizada.*

Os contratos de servizos poderán ser declarados de contratación centralizada na Administración xeral do Estado, nos seus organismos autónomos, entidades xestoras e servizos comúns da Seguridade Social e nas demais entidades públicas estatais, de conformidade co disposto no artigo 184.1. Así mesmo, o servizo poderán ser levado a cabo pola propia Administración coa colaboración de empresas, aplicándose, neste caso e no procedente, o artigo 195.»

#### Artigo 201.

Modifícase o título do artigo e dáselle nova redacción:

«Artigo 201. *Réxime de contratación para actividades docentes.*

1. Nos contratos regulados neste título que teñan por obxecto a prestación de actividades docentes en centros do sector público desenvolvidas en forma de cursos de formación ou perfeccionamento do persoal ó servizo da Administración ou cando se trate de seminarios, coloquios, mesas redondas, conferencias, colaboracións ou calquera outro tipo similar de actividade, sempre que as ditas actividades sexan realizadas por persoas físicas, as disposicións desta lei non serán de aplicación á preparación e adjudicación do contrato.

2. Nesta clase de contratos poderán establecerse o pagamento parcial anticipado, logo de constitución de garantía por parte do contratista, sen que poida autorizarse a súa cesión.

3. Para acreditar a existencia dos contratos a que se refire este artigo, abondará a designación ou nomeamento por autoridade competente.»

#### Artigo 202.

Dáselle nova redacción ó artigo:

«Artigo 202. *Contratos menores.*

Os contratos comprendidos neste título terán a consideración de contratos menores cando a súa contía non exceda de 2.000.000 de pesetas, agás nos contratos a que se refire o artigo 197.3, concertados con empresas de traballo temporal, nos que non existirá esta categoría de contratos.»

#### Artigo 203.

Modifícase o título do artigo e dáselle nova redacción ó número 2:

«Artigo 203. *Xustificación do contrato e determinación do prezo.*

2. No prego de cláusulas administrativas particulares establecerase o sistema de determinación do prezo destes contratos, que poderán consistir en prezos referidos a compoñentes da prestación, unidades de obra, unidades de tempo ou en aplicación de honorarios por tarifas, nun tanto alzado cando non sexa posible ou conveniente a súa descomposición ou nunha combinación de varias destas modalidades.»

#### Artigo 204.

Dáselle nova redacción ós números 1 e 2 que integran o artigo:

«Artigo 204. *Supostos de publicidade.*

1. Os órganos de contratación darán a coñecer, mediante un anuncio indicativo, os contratos que teñan proxectado subscribir durante os doce meses seguintes en cada unha das categorías 1 a 16 das enumeradas no artigo 207, sempre que o seu importe, con exclusión do imposto sobre o valor engadido, sexa igual ou superior a 121.825.156 pesetas.

Este anuncio enviarase o antes posible a partir da súa programación á Oficina de Publicacións Oficiais das Comunidades Europeas e, para que produza o efecto de redución de prazos previsto no artigo 208, números 1 e 3, deberá terse enviado á citada oficina cunha antelación mínima de cincuenta e dous días e máxima de doce meses a partir da data do envío do anuncio do contrato ó "Diario Oficial de las Comunidades Europeas".

2. Ademais, cando o contrato tamén estea comprendido nas categorías 1 a 16 das enumeradas no artigo 207 deberá publicarse un anuncio no "Diario Oficial de las Comunidades Europeas" cando teñan que se adjudicar por procedemento aberto, por procedemento restrinxido ou por procedemento negociado con publicidade comunitaria, sempre que a súa contía, con exclusión do imposto sobre o valor engadido, sexa igual ou superior ás seguintes cifras:

a) 32.486.708 pesetas nos contratos da categoría 8 e nos contratos da categoría 5 consistentes en servizos de difusión de emisións de televisión e de radio, en servizos de conexión e en servizos integrados de telecomunicacións.

b) 21.752.164 pesetas nos restantes contratos das categorías 1 a 16 do artigo 207, cando teñan que ser adjudicados polos órganos de contratación da Administración xeral do Estado, incluídos os dos seus organismos autónomos.

c) 33.464.867 pesetas no mesmo suposto da letra b), cando teñan que ser adjudicados polos restantes órganos de contratación.»

#### Artigo 208.

Dáselle nova redacción ó número 1:

«Artigo 208. *Prazos no procedemento aberto, restrinxido e negociado.*

1. No procedemento aberto o prazo de presentación de proposicións non poderán ser inferior

a cincuenta e dous días contados a partir da data do envío do anuncio do contrato á Oficina de Publicacións Oficiais das Comunidades Europeas.

Se, nos prazos previstos, se enviou o anuncio indicativo a que se refire o artigo 204.1, o prazo de presentación de proposicións reducirase a trinta e seis días, como norma xeral, sen que, en ningún caso, esta redución poida ser inferior a vintedous días.»

#### Artigo 209.

Dáselle nova redacción ó número 1:

«Artigo 209. *Procedementos e formas de adxudicación.*

1. Os contratos de consultoría e asistencia e os de servizos adxudicaranse por procedemento aberto, restrinxido ou negociado, este último unicamente nos supostos sinalados nos artigos 210 e 211.»

#### Artigo 210.

Dáselle nova redacción ó número 2:

«Artigo 210. *Procedemento negociado e publicidade comunitaria.*

2. Nos supostos a que se refire o número anterior, cando a contía do contrato, con exclusión do imposto sobre o valor engadido, sexa igual ou superior ás contías fixadas no artigo 204, segundo categorías e órganos de contratación, estes últimos deberán publicar un anuncio no "Diario Oficial de las Comunidades Europeas", aplicándose o prazo previsto no artigo 208.2.»

#### Artigo 211.

Dáselles nova redacción ás letras a), d) e h) e engádesse unha letra i), nova:

«Artigo 211. *Procedemento negociado sen publicidade.*

a) Cando o contrato non se chegase a adxudicar nun procedemento aberto ou restrinxido por falta de licitadores ou porque os presentados non fosen admitidos a licitación, sempre que non se modifiquen as condicións orixinais do contrato, agás o prezo, que non poderá ser aumentado en máis dun 10 por 100. Neste suposto remitiráselle un informe á Comisión da Comunidade Europea, por petición desta, cando a contía do contrato sexa igual ou superior ós límites sinalados no artigo 204.2.»

«d) Os estudos, servizos ou traballos complementarios que non figuren no proxecto, nin no contrato, pero que resulte necesario executar como consecuencia de circunstancias imprevistas e a súa execución se lle confíe ó contratista principal de acordo cos prezos que rexen para o contrato inicial ou, se é o caso, fosen fixados contradictoriamente.

Para a aplicación do establecido no parágrafo anterior deberán concorre-los seguintes requisitos respecto do contrato principal:

1. Que os estudos, servizos ou traballos non poidan separarse técnica ou economicamente do contrato principal sen lle causar graves inconvenientes á Administración ou que, aínda que se poidan separar da execución do contrato inicial, sexan estritamente necesarios para as fases posteriores.

2. Que o importe acumulado dos estudos, servizos ou traballos complementarios non supere o 20 por 100 do importe do contrato primitivo.

Os demais estudos, servizos ou traballos que non reúnan os requisitos esixidos nos parágrafos precedentes terán que ser obxecto de contratación independente.»

«h) Os de orzamento inferior a 5.000.000 de pesetas.

i) Os que sexan consecuencia da aplicación das disposicións do artigo 223.1.b) do Tratado Constitutivo da Comunidade Europea, que deba subscribi-lo Ministerio de Defensa con empresas estranxeiras, cando non existan empresas nacionais capacitadas para executalo.

Estes contratos rexeranse pola presente lexislación, sen prexuízo do que se conveña entre as partes de acordo coas normas e usos vixentes no comercio internacional.»

## LIBRO II

### TÍTULO IV

#### CAPÍTULO V

Divídese en dúas seccións, 1.<sup>a</sup> e 2.<sup>a</sup>, o capítulo V, integrando os artigos que se indican, e engádesse un artigo 213 bis.

«SECCIÓN 1.<sup>a</sup> DO CUMPRIMENTO DOS CONTRATOS DE CONSULTORÍA E ASISTENCIA E DOS DE SERVICIOS»

«Artigo 213 bis. *Cumprimento dos contratos.*

1. O órgano de contratación determinará se a prestación realizada polo contratista se axusta ás prescricións establecidas para a súa execución e cumprimento, requirindo, se é o caso, a realización das prestacións contratadas e a emenda dos defectos observados con ocasión da súa recepción. Se os traballos efectuados non se adecúan á prestación contratada, como consecuencia de vicios ou defectos imputables ó contratista, poderaa rexeitar, e quedará exento da obriga de pagamento ou terá dereito, se é o caso, á recuperación do prezo satisfeito.

2. Se durante o prazo de garantía se acreditase a existencia de vicios ou defectos nos traballos efectuados, o órgano de contratación terá dereito a lle reclamar ó contratista a emenda deles.

3. Rematado o prazo de garantía sen que a Administración formalizase algún dos reparos ou a denuncia a que se refiren os números anteriores, o contratista quedará exento de responsabilidade por razón da prestación efectuada, sen prexuízo do establecido nos artigos 217, 218 e 219.

4. O contratista terá dereito a coñecer e ser oído sobre as observacións que se formulen en relación co cumprimento da prestación contratada.»

«SECCIÓN 2.<sup>a</sup> DA RESOLUCIÓN DOS CONTRATOS DE CONSULTORÍA E ASISTENCIA E DOS DE SERVICIOS»

Esta sección comprenderá os artigos 214 e 215.

#### Artigo 214.

Dáselle nova redacción á letra c) e engádesse unha letra d), nova:

«Artigo 214. *Causas de resolución.*

c) As modificacións no contrato, aínda que fosen sucesivas, que impliquen, illada ou conxun-



tamente, alteracións do prezo do contrato en contía superior, en máis ou en menos, ó 20 por 100 do prezo primitivo do contrato, con exclusión do imposto sobre o valor engadido, ou representen unha alteración substancial del.

d) Os contratos complementarios a que se refire o artigo 199.2 quedarán resoltos, en todo caso, cando se resolva o contrato principal.»

#### Artigo 215.

Dáselle nova redacción ós números 2 e 3:

«Artigo 215. *Efectos da resolución.*

2. No suposto de suspensión da iniciación do contrato por tempo superior a seis meses, o contratista só terá dereito a percibir unha indemnización do 5 por 100 do prezo daquel.

3. No caso da letra b) do artigo anterior o contratista terá dereito ó 10 por 100 do prezo dos estudos, informes, proxectos ou traballos pendentes de realizar en concepto de beneficio deixado de obter.»

## LIBRO II

### TÍTULO IV

#### CAPÍTULO VI

Modifícase o título do capítulo VI:

#### «CAPÍTULO VI

#### **Das especialidades do contrato de elaboración de proxectos»**

#### Artigo 216.

Dáselle nova redacción ós números 2 e 3:

«Artigo 216. *Concursos de proxectos con intervención de xurado.*

2. Cando a contía do concurso, determinada polo importe total dos premios e pagamentos ós participantes, sexa igual ou superior ás cifras que figuran no artigo 204.2, segundo as categorías de servizos e órganos de contratación, estes últimos publicarán un anuncio no "Diario Oficial de las Comunidades Europeas", aplicándose os prazos previstos no artigo 208.

3. Se o número de participantes é limitado, a súa selección levarase a cabo mediante criterios obxectivos, claros e non discriminatorios, indicados no anuncio e no prego que defina as características e regras do concurso.»

#### Disposición adicional segunda.

Dáselle nova redacción á disposición adicional:

«Disposición adicional segunda. *Actualización de cifras fixadas pola Comunidade Europea.*

As cifras que no sucesivo sexan fixadas pola Comisión Europea e se publiquen por orde do ministro de Economía e Facenda, en unidades de conta europeas (ecus), dereitos especiais de xiro, euros ou pesetas, substituirán as que figuran no texto desta lei.»

#### Disposición adicional oitava.

Dáselle nova redacción á disposición adicional:

«Disposición adicional oitava. *Contratación con empresas que teñan no seu cadro de persoal minusválidos e con entidades sen ánimo de lucro.*

1. Os órganos de contratación poderán sinalar nos pregos de cláusulas administrativas particulares a preferencia na adxudicación dos contratos para as proposicións presentadas por aquelas empresas públicas ou privadas que, no momento de acreditaren a súa solvencia técnica, teñan no seu cadro de persoal un número de traballadores minusválidos non inferior ó 2 por 100, sempre que as ditas proposicións igualem nos seus termos as máis vantaxosas desde o punto de vista dos criterios obxectivos que sirvan de base para a adxudicación.

2. Na mesma forma e condicións poderá establecerse tal preferencia na adxudicación dos contratos relativos a prestacións de carácter social ou asistencial para as proposicións presentadas por entidades sen ánimo de lucro, con personalidade xurídica, sempre que a súa finalidade ou actividade teña relación directa co obxecto do contrato, segundo resulte dos seus respectivos estatutos ou regras fundacionais e figuren inscritas no correspondente rexistro oficial. Neste suposto, o órgano de contratación poderá requirir destas entidades a presentación do detalle relativo á descomposición do prezo ofertado en función dos seus custos.»

#### Disposición adicional novena.

Dáselle nova redacción á disposición adicional:

«Disposición adicional novena. *Normas específicas de réxime local.*

1. Fíxase no 10 por 100 o límite sinalado no artigo 88.3 da Lei 7/1985, do 2 de abril, reguladora das bases do réxime local, para a utilización do procedemento negociado nos contratos de obras, de subministración, de consultoría e asistencia e de servizos polas entidades locais, sen que, en ningún caso, poidan superarse os establecidos nos artigos 141, letra g), 183, letras i) e k), e 211, letra h).

2. Nas entidades locais será potestativa a constitución de xuntas de contratación que actuarán como órgano de contratación nos contratos de obras que teñan por obxecto traballos de reparación simple, de conservación e de mantemento, nos contratos de subministración que se refiran a bens consumibles ou de fácil deterioración polo uso, e nos contratos de consultoría e asistencia e nos de servizos cando o seu importe non supere o 10 por 100 dos recursos ordinarios da entidade, ou, cando superen esta cifra, as accións estean previstas no orzamento do exercicio a que corresponda e se realicen de acordo co disposto nas bases de execución deste.

O acordo de constitución das xuntas de contratación adoptarao o Pleno, que poderá establecer límites inferiores ós sinalados no parágrafo anterior e determinará a súa composición, debendo formar parte delas necesariamente o secretario e o interventor da corporación.

Nos casos de actuación das xuntas de contratación prescindirase da intervención da mesa de contratación.

3. A mesa de contratación estará presidida polo presidente da corporación, ou membro desta en quen delegue, e formarán parte dela como vocais o secretario e mailo interventor e aqueles outros que designe o órgano de contratación de entre os seus membros, sen que o seu número, en total, sexa inferior a tres. Actuará como secretario un funcionario da corporación.

4. Nos supostos de modificacións dos contratos a que fai referencia o artigo 102.3, o importe de 1.000.000.000 de pesetas substituirase polo que se corresponda co 20 por 100 dos recursos ordinarios da entidade local, agás que o importe resultante sexa superior á citada contía, caso en que esta será de aplicación. A referencia deste mesmo artigo e número á Dirección Xeral de Orzamentos do Ministerio de Economía e Facenda deberá entenderse feita á Comisión Especial de Contas nas entidades locais en que existan.

5. Os consorcios a que se refiren os artigos 57 e 87 da Lei 7/1985, do 2 de abril, reguladora das bases do réxime local, nos que a participación pública sexa maioritaria adxudicarán os seus contratos conforme o disposto nesta lei.»

#### Disposición adicional décima.

Engádesse unha disposición adicional décima, nova, co seguinte texto:

«Disposición adicional décima. *Adhesión ós sistemas de contratación centralizada de adquisición de bens e servizos.*

1. As comunidades autónomas, entidades locais, os seus organismos autónomos e entes públicos poderán adherirse ó sistema de contratación centralizada establecido nos artigos 184.1 e 200, para a totalidade ou para categorías de bens e servizos, mediante acordos coa Dirección Xeral do Patrimonio do Estado.

2. Para os efectos establecidos no parágrafo segundo do artigo 183, letra g), e no parágrafo segundo do artigo 211, letra f), a declaración de uniformidade dos bens e servizos de utilización específica por algún departamento ministerial habilitará para que outros órganos de contratación, mantendo as súas competencias de contratación, poidan adherirse ós contratos que se formalicen en virtude dos concursos para a determinación de tipo que se subscriban.

As comunidades autónomas e as entidades locais poderán adherirse a tales contratos, mantendo as súas competencias mediante acordos co ministerio que declarase a uniformidade de tales bens e adxudique o contrato derivado do correspondente concurso para a determinación de tipo.

3. Tamén, mediante os correspondentes acordos, as comunidades autónomas e as entidades locais poderán adherirse a sistemas de adquisición centralizada doutras comunidades autónomas e entidades locais.»

#### Disposición adicional décimo primeira.

Engádesse unha disposición adicional décimo primeira, nova, co seguinte texto:

«Disposición adicional décimo primeira. *Contratos subscritos nos sectores da auga, da enerxía, dos transportes e das telecomunicacións.*

1. Os órganos de contratación que subscriban contratos comprendidos no ámbito da Lei 48/1998,

do 30 de decembro, sobre procedementos de contratación nos sectores da auga, a enerxía, os transportes e as telecomunicacións, pola que se incorporan ó ordenamento xurídico español as directivas 93/38/CEE e 92/13/CEE, terán en conta, para efectos de publicidade de anuncios destes contratos, os límites cuantitativos que se establecen na dita lei.

2. As entidades públicas incluídas no ámbito da Lei 48/1998, do 30 de decembro, rexeranse, no non previsto nela, polas súas normas de contratación específicas.

O ministerio ó que estean adscritas as citadas entidades poderá aprobar, cando o réxime de contratación destas sexa o de dereito privado, normas ou condicións xerais de contratación co fin de asegurar a homoxeneización desta e o respecto ós principios de publicidade, concorrencia e non-discriminación da contratación do sector público. Sobre o repertorio das normas ou condicións xerais deberá emitir informe preceptivamente o Servizo Xurídico do Estado.»

#### Disposición adicional décimo segunda.

Engádesse unha disposición adicional décimo segunda, nova, co seguinte texto:

«Disposición adicional décimo segunda. *Clasificación esixible polas universidades públicas.*

Para efectos do número 3 do artigo 29, para os contratos que subscriban as universidades públicas que teñan a súa sede en territorio dunha comunidade autónoma producirán efecto os acordos de clasificación e revisión de clasificacións adoptados polos correspondentes órganos da comunidade autónoma respectiva.»

#### Disposición adicional décimo terceira.

Engádesse unha disposición adicional décimo terceira, nova, co seguinte texto:

«Disposición adicional décimo terceira. *Substitución de letrados nas mesas de contratación.*

Para as entidades xestoras e servizos comúns da Seguridade Social poderán establecerse regulamentariamente os supostos en que formarán parte da mesa de contratación letrados habilitados especificamente para iso en substitución dos que teñan atribuído legal ou regulamentariamente o asesoramento xurídico do órgano de contratación.»

#### Disposición transitoria segunda.

Dáselle nova redacción:

«Disposición transitoria segunda. *Fórmulas de revisión de prezos.*

Ata que, de conformidade co disposto no artigo 105, se aproben fórmulas tipo para a revisión de prezos, seguirán aplicándose as aprobadas polo Decreto 3650/1970, do 19 de decembro; polo Real decreto 2167/1981, do 20 de agosto, polo que se complementa o anterior, e polo Decreto 2341/1975, do 22 de agosto, para contratos de fabricación do Ministerio de Defensa, sen que resulte aplicable o sumando fixo (0,15) que figura nelas.»

## Disposición transitoria décima.

Engádesse unha disposición transitoria décima, nova, co seguinte texto:

«Disposición transitoria décima. *Adaptación dos contratos ó "efecto 2000"*.

Nos contratos que teñan por obxecto a adquisición de bens ou prestación de servizos, que poidan verse afectados polo denominado "efecto 2000", os pregos de cláusulas administrativas e de prescricións técnicas incluírán, en todo caso, a esixencia de conformidade dos ditos bens ou servizos co ano 2000. Será causa de resolución do contrato a falta de inclusión das citadas esixencias ou o seu incumprimento con ocasión da execución do contrato. O contratista estará obrigado a indemnizar os danos e perdas causados á Administración.»

## Disposición transitoria décimo primeira.

Engádesse unha disposición transitoria décimo primeira, nova, co seguinte texto:

«Disposición transitoria décimo primeira. *Prezos dos contratos en euros*.

Desde o 1 de xaneiro de 1999 ata o 31 de decembro do ano 2001, os prezos dos novos contratos subscritos polas administracións públicas, cando utilicen a peseta como unidade de conta, e os importes monetarios utilizados como expresións finais nas normas que a partir da dita data se dicten, deberán facer constar a continuación o importe equivalente na unidade de conta euro ó tipo de conversión, podendo, neste caso, expresar unha cifra final en euros cun número de decimais non superior a seis.»

## Disposición derradeira primeira.

Dáselle nova redacción ós números 1 e 2:

«Disposición derradeira primeira. *Carácter de lexislación básica e non básica*.

1. Esta lei constitúe lexislación básica dictada ó abeiro do artigo 149.1.18.<sup>a</sup> da Constitución e, en consecuencia, é de aplicación xeral a tódalas administracións públicas comprendidas no artigo 1, agás os seguintes artigos ou parte deles:

- O artigo 10.
- O artigo 12, a excepción do seu número 6.
- A letra j) do artigo 20.
- O parágrafo segundo do número 1 do artigo 24.
- O artigo 33.
- O artigo 38.
- O artigo 39.
- O prazo de quince días previsto no número 1 do artigo 42.
- O artigo 49.
- Os números 3 e 4 do artigo 50.
- O artigo 51.
- O número 2 do artigo 52.
- O prazo de trinta días previsto no artigo 55.
- O artigo 58 en canto á posible existencia nas comunidades autónomas de órganos de fiscalización equivalentes ó Tribunal de Contas.
- O número 2 do artigo 60.
- Os números 2 e 3 do artigo 68.
- O número 2 do artigo 70.
- A letra a) do número 2 do artigo 72.

O último inciso da letra a) do número 1 e a letra b) do mesmo número do artigo 73.

O segundo inciso do número 1 do artigo 80.

O artigo 82 e cantas referencias se fagan á mesa de contratación noutros artigos.

No artigo 84 o prazo máximo de vinte días do número 1, o último inciso da letra a) do número 2 en canto se refire ó "preceptivo dictame do servizo xurídico do órgano de contratación", o último inciso do parágrafo primeiro da letra b) do número 2, en canto se refire ó "informe da Xunta Consultiva de Contratación Administrativa" e o último inciso do número 3, en canto fai referencia ó "asesoramento técnico do servizo correspondente".

O número 1 do artigo 90.

A cifra de vinte que figura no último inciso da letra b) do número 1 do artigo 92.

O artigo 96, agás o número 1.

O artigo 97, agás os requisitos de audiencia do interesado e dictame do Consello de Estado ou órgano consultivo equivalente da Comunidade Autónoma respectiva.

O artigo 107.

O artigo 108.

O artigo 109.

O último inciso do número 2 do artigo 111.

Os números 3, 6 e 7 do artigo 113.

A letra a) do número 1 do artigo 117.

O artigo 119.

A letra e) do número 1 e o número 5 do artigo 124.

Os números 3, agás o seu primeiro inciso en canto se refire á expresión "o contratista presentará o proxecto ó órgano de contratación para a súa supervisión, aprobación e replanteo", 4 e 5 do artigo 125.

O artigo 126.

O artigo 128.

A porcentaxe do 30 por 100 do artigo 131.

O último inciso da letra f) do artigo 141.

O prazo dun mes e o último inciso, "remitíndoselle un exemplar dela ó órgano que subscribiu o contrato" do artigo 142.

O último inciso do número 1 do artigo 143.

O número 1 do artigo 145, agás o prazo de dez días a que fai referencia nel.

Os números 2, 3 e 4 do artigo 146 e os números 1 e 3 do artigo 147 en canto se refiren ó "director facultativo da obra".

O parágrafo segundo do número 2 e o número 4 do artigo 147.

As letras a), b) e c) do artigo 150.

O artigo 152, agás o primeiro inciso do número 1.

O artigo 153.

O artigo 154.

O último inciso do primeiro parágrafo da letra c) do número 2 do artigo 160.

O artigo 164.

O artigo 166.

O artigo 167.

O artigo 168.

O artigo 169.

O artigo 170, agás o número 1.

O artigo 174.

O número 1 do artigo 175.

O parágrafo segundo da letra g) e o último inciso da letra h) do artigo 183.

O artigo 184.

O artigo 185.

O artigo 186, agás o primeiro inciso do número 1.

O artigo 188.  
 O artigo 189.  
 O artigo 191.  
 Os números 1, 2 e 3 do artigo 192.  
 As letras a) e b) do artigo 193.  
 O artigo 194, agás o número 1.  
 O artigo 195.  
 O artigo 196.  
 O artigo 200.  
 O número 1 do artigo 203 en canto se refire ó “servicio interesado na subscripción do contrato”.  
 O parágrafo segundo da letra f) e o último inciso da letra g) do artigo 211.  
 O número 2 do artigo 212.  
 As letras a), b) e d) do artigo 214.  
 O artigo 215, agás o número 1.  
 O artigo 217.  
 O artigo 218.  
 O artigo 219.  
 A disposición adicional terceira.  
 A disposición adicional décima.  
 A disposición transitoria terceira.  
 A disposición transitoria cuarta.  
 A disposición transitoria quinta.  
 A disposición transitoria novena.

2. Para os mesmos efectos previstos no número anterior terán o carácter de máximos:

Os prazos de dous meses, catro meses e oito meses previstos no artigo 100.  
 As porcentaxes do 10 e 30 por 100 e a cifra de 1.000.000.000 de pesetas que figuran no artigo 102.3.  
 Os prazos dun mes e seis meses mencionados nos números 2 e 4 do artigo 111.  
 As porcentaxes do 2 por 100 do artigo 36.1 e do 4, 6 e 20 por 100 que se recollen no artigo 37, números 1, 3 e 4, e a porcentaxe do 20 que se recolle nos artigos 84.5 e 87.3.  
 As contías dos artigos 121, 177 e 202.»

#### Disposición derradeira segunda.

Dáselle nova redacción ó número 2:

«Disposición derradeira segunda. *Referencia ás administracións públicas e ós órganos da Administración xeral do Estado.*

2. Así mesmo, cando se faga referencia a órganos da Administración xeral do Estado, deberá entenderse feita, en todo caso, ós que correspondan das restantes administracións públicas, organismos e entidades comprendidos no ámbito de aplicación do artigo 1, agás as que se lles fan ós seguintes órganos:

Ó ministro de Economía e Facenda e á Xunta Consultiva de Contratación Administrativa no artigo 21.

Ó ministro de Economía e Facenda no artigo 25, número 1 do artigo 34 e disposición adicional segunda.

Á Xunta Consultiva de Contratación Administrativa no número 2 e no número 4 do artigo 29, no número 1 do artigo 34 e no artigo 35.

Á Xunta Consultiva de Contratación Administrativa nos artigos 59, 117 e 118.

Ó Consello de Ministros e á Xunta Consultiva de Contratación Administrativa no artigo 105 e á Comisión Delegada do Goberno para Asuntos Económicos no artigo 106.

Ó Consello de Ministros na disposición adicional primeira.»

#### Disposición adicional primeira.

O Rexistro Oficial de Contratistas, dependente do Ministerio de Economía e Facenda, pasará a denominarse Rexistro Oficial de Empresas Clasificadas.

#### Disposición adicional segunda. *Réxime xurídico da «Sociedad Estatal de Gestión Inmobiliaria de Patrimonio, Sociedad Anónima».*

1. A «Sociedad Estatal de Gestión Inmobiliaria de Patrimonio, Sociedad Anónima» (SEGIPSA), o capital social da cal deberá ser de titularidade pública, terá a consideración de medio propio instrumental e servicio técnico da Administración, e estará obrigada a realizar os traballos que lle encomende a Administración xeral do Estado e os seus organismos e entidades de dereito público e as entidades xestoras e servicios comúns da Seguridade Social, nas seguintes materias:

a) Administración, mantemento, valoración e alleamento de bens inmobles integrantes do patrimonio do Estado ou doutros patrimonios inmobiliarios públicos.

b) Traballos e estudos de investigación de bens vacantes, ociosos ou de presunta titularidade estatal, de comprobación, de depuración e identificación física e xurídica, de regularización e de actualización do Inventario Xeral de Bens e Dereitos do Estado.

c) Traballos, estudos e proxectos técnicos para mellora e optimización do patrimonio inmobiliario utilizado polos citados organismos, incluída a redacción de propostas de relocalización.

d) Traballos de colaboración técnica coa Dirección Xeral do Patrimonio do Estado para a xestión dos expedientes administrativos incoados en aplicación da Lei 43/1998, de 15 de decembro, de restitución ou compensación ós partidos políticos de bens e dereitos incautados en aplicación da normativa sobre responsabilidades políticas do período 1936-1939, e do seu regulamento aprobado polo Real decreto 610/1999, do 16 de abril.

2. O importe que se pagará polos servicios, traballos, proxectos e estudos realizados por medio de SEGIPSA determinarase aplicando ás unidades executadas as tarifas que fosen aprobadas polo subsecretario de Economía e Facenda, por proposta da Dirección Xeral do Patrimonio do Estado. Estas tarifas calcularanse de maneira que representen os custos reais de realización.

O pagamento delas, que terá a consideración de investimento, efectuarase logo de certificación de conformidade expedida polo órgano que encomendase os traballos.

O órgano encomendante poderá supervisar —en todo momento— a correcta realización por SEGIPSA do obxecto da encomenda.

3. O alleamento por SEGIPSA, como medio propio instrumental e servicio técnico da Administración de bens inmobles do Patrimonio do Estado, suxeitarase ás seguintes regras:

a) O Ministerio de Economía e Facenda elevaralle ó Consello de Ministros, para a súa aprobación, os plans nos que se expresen as bases para o desinvestimento do patrimonio inmobiliario do Estado susceptible de alleamento.

b) Os inmobles que se vaian allear serán vendidos ou achegados a SEGIPSA pola Dirección Xeral do Patrimonio do Estado.

c) O valor da venda ou achega dos inmobles será o que determine a valoración dos servicios técnicos da Dirección Xeral do Patrimonio do Estado, sen que sexa de aplicación o previsto no artigo 38 do Real decreto legislativo 1564/1989, do 22 de decembro, polo que

se aproba o texto refundido da Lei de sociedades anónimas.

4. Para o alleamento por SEGIPSA de bens doutros patrimonios inmobiliarios públicos das entidades a que se refire o número 1 da presente disposición, o Consello de Ministros deberá aproba-lo correspondente plan de desinvestimento, por proposta conxunta do Ministerio do que dependa o organismo e do de Economía e Facenda. Neste suposto, a alleamento previo a SEGIPSA do inmovible requirirá a conformidade de ámbalas partes sobre o seu valor.

5. Respecto das materias sinaladas no número 1, SEGIPSA non poderá participar nos procedementos para a adxudicación de contratos convocados polas administracións públicas das que sexa medio propio. Non obstante, cando non concorran ningún licitador, poderá encargárselle a SEGIPSA a actividade obxecto de licitación pública.

6. Os contratos de obras, subministracións, de consultoría e asistencia e de servizos que SEGIPSA deba concertar para a execución das actividades que se expresan no número 1 adxudicaranse mediante a aplicación do procedemento establecido para o efecto na Lei 13/1995, do 18 de maio, de contratos das administracións públicas, cando, en función do seu importe, a licitación deba ser obxecto de publicidade no «Diario Oficial das Comunidades Europeas» respecto das contías establecidas nos artigos 135, 178 e 204 da dita lei para os órganos e entidades de dereito público que se integran na Administración xeral do Estado.

#### Disposición transitoria única.

Os expedientes de contratación iniciados e os contratos adxudicados con anterioridade á entrada en vigor desta lei rexeranse pola normativa anterior.

#### Disposición derogatoria única.

Quedan derogadas cantas disposicións de igual ou inferior rango se opoñan ó preceptuado nesta lei.

#### Disposición derradeira única.

1. Esta lei entrará en vigor ós tres meses da súa publicación no «Boletín Oficial del Estado», agás a disposición transitoria décima e a disposición adicional segunda desta mesma lei, que entrarán en vigor ó día seguinte da citada data de publicación.

2. Autorízase o Goberno para que no prazo de seis meses a partir da publicación desta lei no «Boletín Oficial del Estado» elabore un texto refundido da Lei de contratos das administracións públicas, ó que se incorporen as modificacións que no seu texto se introducen por esta lei e nas seguintes disposicións:

Disposición adicional primeira da Lei 9/1996, do 15 de xaneiro, pola que se adoptan medidas extraordinarias, excepcionais e urxentes en materia de abastecementos hidráulicos como consecuencia da persistencia da seca.

Artigo 2 da Lei 11/1996, do 27 de decembro, de medidas de disciplina orzamentaria.

Artigos 72, 148 e 149 da Lei 13/1996, do 30 de decembro, de medidas fiscais, administrativas e da orde social.

Artigo 77 da Lei 66/1997, do 30 de decembro, de medidas fiscais, administrativas e da orde social.

Artigo 56 da Lei 50/1998, do 30 de decembro, de medidas fiscais, administrativas e da orde social.

Artigo 30 da Lei 46/1998, do 17 de decembro, sobre introducción do euro.

A autorización á que se refire este número comprende a facultade de regularizar, aclarar e harmoniza-los textos legais que han ser refundidos.

3. O Goberno, no prazo dun ano, procederá a aprobar un prego de cláusulas administrativas xerais para a contratación de bens e de servizos informáticos.

Por tanto.

Mando a tódolos españois, particulares e autoridades, que cumpran e fagan cumprir esta lei.

Madrid, 28 de decembro de 1999.

JUAN CARLOS R.

O presidente do Goberno,  
JOSÉ MARÍA AZNAR LÓPEZ

**24785** LEI 54/1999, do 29 de decembro, de orzamentos xerais do Estado para o ano 2000. («BOE» 312, do 30-12-1999.)

JUAN CARLOS I

REI DE ESPAÑA

Saiban tódolos que a viren e a entenderen que as Cortes Xerais aprobaron e eu sanciono a seguinte lei.

#### EXPOSICIÓN DE MOTIVOS

I

O Tribunal Constitucional, a partir da sentenza (STC) 27/1981, foi precisando o contido posible da Lei anual de orzamentos xerais do Estado (SSTC 76/1992, 195/1994, entre outras). Veu a determina-lo Alto Tribunal que na Lei de orzamentos xerais do Estado existe un contido mínimo necesario e indispoñible que está constituído pola determinación da previsión de ingresos e a autorización de gastos que poden realiza-lo Estado e entes a el vinculados ou del dependentes no exercicio de que se trate. A carón deste contido necesario, cabe a posibilidade de que se engada un contido eventual, aínda que estrictamente delimitado. Este contido eventual da Lei de orzamentos xerais do Estado queda limitado a aquelas materias ou cuestións que garden directa relación coas previsións de ingresos, as habilitacións de gasto ou os criterios de política económica xeral, que sexan complemento necesario para a máis fácil interpretación e máis eficaz execución dos orzamentos xerais do Estado e da política económica do Goberno. As materias que queden á marxe destas previsións son materias alleas á Lei de orzamentos xerais do Estado. Desta forma, o contido da Lei de orzamentos xerais do Estado está constitucionalmente acoutado, a diferenza do que sucede coas demais leis, nas que o contido resulta, en principio, ilimitado, dentro do ámbito competencial do Estado e coas exclusións propias da materia reservada a lei orgánica.

II

O contido necesario e esencial da Lei de orzamentos recóllese no título I «Da aprobación dos orzamentos e as súas modificacións», por canto que no seu capítulo I, baixo a rúbrica «Créditos iniciais e o seu financiamento», se aproban a totalidade dos estados de ingresos e gastos do sector público estatal e se consigna o importe dos beneficios fiscais que afectan os tributos do Estado, recollendo o aspecto trifronte que atribúe o artigo 134.2 da Constitución Española ós orzamentos xerais do Estado.